

Exercitationes Duae

Anatomicae

DE CIRCVLATIO-
NE SANGVINIS.

Ad JOANNEM RIOLANUM
filium ; *Parisiensem* Medicum peritissi-
mum, *Anatomicorum* Coryphaeum :
in *Academia Parisiensi* Anatomes &
Herbariae Professore Regium egre-
gium atque Decanum , Reginae ma-
tris Lodovici xiiii. Medicum pri-
marium.

Authore,


GULIELMO HARVEO Anglo,
in Collegio Medicorum Londinen-
sium Anatomes & Chirurgiae Pro-
fessore ; serenissimaeque
Majestatis Regiae
Archiatro.

ROTTERODAMI.

Ex Officina Arnoldi Leers, 1649.







*Exercitatio Anatomica,
De Circulatione Sanguinis,*

A D.

J. RIOLANUM,

PRIMA.

PRODIIT non multis
abhinc mensibus Cla-
rissimi Riolani opuscu-
lum Anatomicum &
Pathologicum propter quod, ipsis-
simâ authoris manu mihi transmis-
sum; gratias lubens refero: gratu-
lor equidem foelicitati illius viri,
quod institutum maximâ dignissi-
mum laude perficiendum susce-
perit.

A 2

2 *Exercitatio Anatomica I.*

perit. Omnium morborum sedes ante oculos ponere, onus est, non nisi divino ingenio exatlandum; gravem sanè subiit provinciam, qui morbos illos, penè intellectus aciem fugientes, oculis prospiciendos tradidit. Decent hæc conamina Anatomicorum principem: nulla enim est scientia, quæ non ex præexistente cognitione oritur, nullaque certa & plenè cognita notitia, quæ non ex sensu originem duxit. Quocirca res ipsa, & tanti viri exemplum, laborem meum efflagitabat, animumque inducebat, meam quoque Anatomiam medicam ad medicinæ usum maximè accomodatam literis mandare & adjungere: non, ut ille, solùm locos morborum ex cadaveribus sanorum indigitando
& se-

de Circulatione Sanguinis. 3

& secundum mentē aliorum, morborum species, qui iis in locis videri debuissent, recensendo, sed ut, ex multis dissectionibus corporum ægrotorū, gravissimis & miris affectionibus confectorum, quomodo, & qualiter partes interiores in situ, magnitudine, constitutione, figurâ, substantiâ & reliquis accidentibus sensibilibus, â naturali formâ & apparentiâ (quam vulgo omnes Anatomici describunt) permutantur, & quam variis modis & miris afficiuntur, enarrandum susceperem. Sicut enim sanorum & boni habitûs corporum dissectionio plurimum ad philosophiam & rectam physiologiam facit, ita corporum morbosorum & cachecticorum inspectio potissimum ad pathologiam philosophicam.

A 3

4 *Exercitatio Anatomica I.*

cam. Quippe eorum, quæ sunt secundum naturam, contemplatio physiologica est prius à medicis noscenda, quoniam, quod secundum naturam est, id rectum & tum suum obliqui regula, cujus luce errores affectusque præternaturales definiendo, Pathologia postea clariùs innotescit, & ex Pathologia, usus & ars medendi, novaque plurima remedia inveniendi occasiones occurrunt. Neque quisquã facile crederet, quantum in morbis præsertim chronicis interiora pervertantur, & quanta partium interiorum monstra in morbis gignantur. Atque, ausim dicere, plus una dissectio & apertio tabidi, aut morbo aliquo antiquo vel venenato confecti corporis, ad medicinam attulit commodi, quam decem.

cem corporum strangulatorum.

Non igitur improbo doctissimi & expertissimi Anatomici *Riolani* institutum, sed summis laudibus celebrandum puto, quippe ad medicinam utile admodum, quod physiologicam partem illustrat, non minus tamen medendi arti proficuum fore existimabam, si non solum locos, sed unà locorum affectus oculis conspiciendos exhiberem, vel observatos & perlustratos enarrarem, & ex multis meis dissectionibus experientiam meam recorderer.

Verum quæ, in illo libello ad me spectare unicum videbantur de circuitu sanguinis à me invento, traducta sunt, perpendenda priùs & potissimum à me veniunt. Non enim parvi faciendum, de re tantâ,

6 *Exercitatio Anatomica I.*

• tanti, viri judicium; (qui omnium, quotquot sunt hujus seculi, Anatomicorum facile princeps & Corypheus æstimatur) sed plus, quàm aliorum omnium vel applaudentium vel repugnantium, ducenda hujus unius viri sententia in gloriam, aut censuram respicienda & pensitanda. Ipse igitur Enchir. lib. 3. c. 8. motum sanguinis nostrum in animalibus agnoscit & in nostras partes, nostramq; de circuitu sanguinis sententiam venit; non tamen ex toto & aperte: ait enim lib. 2. cap. 21. quod sanguis in portâ contentus non circulètur, ut sanguis in venâ cavâ, & lib. 3. cap. 8. Esse sanguinem qui circulatur, & vasa circulatoria esse scilicet aortam & venam cavam: negat tamen eorum propagines circulationem recipere.

re, quia effusus, inquit, sanguis in omnes partes, secunda & tertia regionis, ibi remanet ad nutritionem; nec refluit ad majora vasa, nisi vi revulsus, in maximâ inopiâ sanguinis vasorum majorum, vel impetu & æstro percitus affluat ad majora vasa circulatoria. Atque ita (paulo post) sive sanguis venarum perpetuo ascendat naturaliter, sive remeet ad cor, sive sanguis arteriarum descendat sive discedat à corde, attamen, si vena minores brachiorum & crurum fuerint depleta, potest successione vacuari, venarum sanguis descendere: quod clarè demonstravi, inquit, contra Harveum & VVal-laum. Et quia Galenus & quotidiana experientia confirmet anastomoses venarum & arteriarum, & necessitas circulati sanguinis, videtis, inquit, quomodo fiat circulatio

8 *Exercitatio Anatomica I.*

sanguinis citra perturbationem & confusionem humorum & veteris medicinae destructionem.

Quibus verbis apertum est, quâ de causâ permotus clarissimus ipse sanguinis circuitum agnoscere partim, partim denegare voluit, & cur titubantem inconstantemq; de circuitu opinionem astruere conatur. Nempe, ne veterē medicinam destrueret, non veritate ductus (quam non cernere non potuisset) sed magis ob cautelam, veretur apertè loqui, ne veterem medicinam offenderet, aut forsan traditam, ab ipso in Anthropologia, physiologiam retractare videretur. Nam sanguinis circuitus veterem medicinam non destruit, sed promovet magis; medicorum physiologiam & speculationem de rebus

rebus naturalibus ostendit, & doctrinam Anatomicam de usu & actione cordis, pulmonum, cæterorumque viscerum, redarguit: hæc quod ita sint, facile tum ex ipsius verbis & confessione, partim ex iis, quæ hic subjungam, apparebit, scilicet, totum sanguinem, ubicunque fuerit in corpore vivente, moveri & mutare locum (tam qui in venis majoribus & eorum propaginibus & fibris, quam partium cujuscunque regionis porositatibus contineatur) à corde fluere & ad cor refluere continuè & continenter & nusquã sine detrimento manere: licet, non repugno, quandoq; quibusdam in locis velocior aut tardior ejus motus fiat.

Primum itaque negat solummodo doctissimus vir, sanguinem

propaginibus venæ portæ contentum circulari, quod redarguere, neque negare potuisset, si vim argumenti sui non dissimulasset: ait enim lib. 3. cap. 8. *Si in singulis pulsationibus cor admittat guttam sanguinis, quam expellat in aortam & intra horam bis millenas pulsationes edat, necessum est magnam sanguinis portionem transire. Idem quoque de mesenterio affirmare necessum habet, quando, per arteriam celiacam & mesentericas arterias, plus quam gutta sanguinis pulsationibus singulis intruditur & impingitur in mesenterium & ejus venas: adeo ut vel aliquò exire pro rata ingredientis proportionem debeat necessario, vel venæ portæ rami tandem disrumperentur. Nec (quod hoc dubium solvat) probabili-*

biliter dici, aut fieri potest, ut per easdem arterias influat & refluat; Euripi in morem, irrito & vano labore, sanguis mesenterii: nec relapsus è mesenterio per easdem vias & transvasatio, quâ exonerare voluit mesenterium sese in rortam, veresimilis est: aut contra vim ingredientis prævalere contrario motu potest: nec datur vicissitudo ubi continuè, continenter & incessanter, certum est influxum fieri; sed eâdem necessitate, quâ in corde arguitur sanguinem impactum in mesenterium aliò exire, compellitur. Quod manifestum est, namque aliàs omnem circulationem eo argumento & subterfugio everteret; si idem, eâdem verisimilitudine de cordis ventriculis dicendo, affirmaverit: nempe

nempe in systole cordis impellitur in aortam sanguis, & diastole remeat, aortaque sese in cordis ventriculos exonerat, ut ventriculi vicissim in aortam: atque ita neque in corde neque in mesenterio circulatio, sed fluxus & refluxus vicissitudinarius, vano labore, agitur: si itaque in corde ob dictam rationem à se probatam necessario sanguinis circulatio arguitur, eadem argumenti vis in mesenterio quoque locum habet; si vero in mesenterio nullus sanguinis circuitus, neque similiter in corde, utraque enim affirmatio, hæc scilicet de corde illa de mesenterio, ejusdem argumenti vi, mutatis verbis, pendet stabiliturque aut cadit similiter.

Dicit, in corde impediunt regressum

gressum sigmoides valvulæ, nullæ sunt vero in mesenterio valvulæ. Respondeo neque hoc verum est, in ramo enim splenico, quinetiam quandoque in aliis, repertæ valvulæ. Præterea in venis valvulæ non ubique requiruntur, neque in profundis venis artuum, sed in cutaneis magis, reperiuntur: ubi enim è minoribus ramis profluens naturaliter sanguis in majores proclivis, compressione circumjacentium musculorum, retro meare satis & plus satis impeditur, sed quæ patet iter cogitur, ibi valvulis quid opus est? quantum autem sanguinis singulis pulsationibus in mesenterium impellitur, perinde computatur ac si in carpo mediocri ligatura venas è manu egredientes & in arterias ingredien-
tes

14 *Exercitatio Anatomica I.*

tes constrinxeris (maiores etenim sunt arteriæ mesenterii quam carpi) si quot pulsationibus distendi vasa manus & tumescere in molem totam manum numeraveris, dividendo, & subductione facta, multò plus quam guttam sanguinis ingredi (non obstante ligaturâ) singulis pulsibus reperiēs. Nec retro meare posse, quin potius replendo, manum totam vi distendere & in molem efferre, eâdem quantitate sanguinem ingredi mesenterium, per analogiam, colligere licet, si non majori, quanto majores arteriæ mesenterii sunt quam carpi. Et si quisquam viderit & cogitaverit quantâ difficultate & molimine, compressionibus, ligaturis apparatusque multiplici cohibetur impetuosus profluens

liens sanguis , è rescissâ vel disruptâ minimâ arteriolâ , quantis viribus (veluti si syphone ejaculetur) omnem apparatus projicit, propellit , aut pertransit, vix puto crederet verisimile, tantum ingredientis sanguinis , contra impulsu & influxum , retrò meare quidquam posse, unde non pari vi repellitur. Quapropter hæc animo secum revolvens , è mesenterio contra influxum per arterias adeo impetuosum & fortem sanguinem è venis portæ per easdem vias obrepere & ità mesenterium exonerare , haud puto animum induceret ad credendum.

Insuper si non , circulari motu moveri sanguinem & mutari , arbitretur vir doctissimus , sed semper eundem in mesenterii propargini-

16. *Exercitatio Anatomica 1.*

ginibus stagnare, supponere videtur, duplicem esse sanguinem, diversumque, diversoque usui & fini inservientem; & proinde diversæ naturæ in venis portæ & cavâ, quia iste circulatione indiget ad sui conservationem, ille non indiget, quod neque apparet neque ipse demonstrat verum esse.

Præterea addit vir doctissimus Enchirid. lib. 2. cap. 18. *quantum genus vasorum mesenterio, quæ venæ lacteæ dicuntur; (inventæ Ab Asselio,) quibus positis, videtur astruere, omne alimentum ab intestinis extractum per ipsas ad jecur, officinam sanguinis, derivari, quo inibi concocto & in sanguinem transmutato, (dicit lib. 3. caput 8.) ad dextrum cordis ventriculum traducitur, quibus positis, inquit, omnes difficultates quæ olim moveban-*

vebantur, de distributione chyli & sanguinis, per eundem canalem cessant; nam vena lactea vehunt chylum ad Hepar & proinde seorsum isti canales sunt, & seorsum obstrui possunt. Verum enimvero quomodo si lac illud in jecur transfundatur & pertranseat, inde per cavam ad cordis ventriculum (quando sanguinem in ramis portæ, sinæ hepatis distributis numerosissimis contentum posse pertransire, ut ita fiat circulatio negat vir doctissimus) unde hoc verisimile demonstretur, scire velim, præsertim cum & spirituosior & penetrativus magis sanguis, quam chylus aut lac in illis lacteis vasis contentum, apparet, & adhuc ab arteriarum pulsu urgetur, ut alicubi viam inveniat.

Doctissimus vir mentionem facit

cit tractatus cujusdam sui de circulatione sanguinis, utinam viderem, forsan resipiscerem.

Sed enim vir doctissimus si maluisset, in portæ venis & cavæ ramulis, ponere circularem motum sanguinis (uti dicit lib. 3. cap. 8. *in venis sanguis perpetuò & naturaliter ascendit sive remeat ad cor, sicut is in omnibus arteriis descendit sive discedit a corde*) non video, inquam, quin hoc posito, omnes difficultates, quæ olim movebantur de distributione chyli & sanguinis per eodem canales, æquè cessarent; ut & ultrà non necesse haberet seorsum vasa chyli inquirere aut ponere. Quandoquidem, sicut venæ umbilicales ab ovi liquoribus succum alimentativum absorbent, deferuntque ad nutriendū & augmentandum.

tandum pullum, adhuc embryonem existentem, ita venæ meseraicæ ab intestinis chylum sugunt, & in jecur deferunt, idemque officium adulto præstare quid prohibet asseverare? cessant enim omnes notæ difficultates, cum in iisdem vasis non duo contrarii simul motus supponuntur, sed eundem continuò motum in meseraicis ab intestinis in jecur supponimus.

De venis lacteis quid sentiendum alibi dicam, cum de lacte tractavero in diversis recens natorum partibus reperto præsertim humano; reperitur enim in mesenterio & omnibus ejus glandulis, in thymoque, axillis etiam & mammis infantum; lac obstetrices emungunt, ut putant, in salutem.

At insuper doctissimo Riolano

20 *Exercitatio Anatomica I.*

non modo in mesenterio contentum sanguinem circulatione privari placuit, sed neque propagines venæ cavæ, aut arteriæ, neque ullas partes secundæ aut tertiæ regionis circulationem recipere affirmat: adeo ut vasa circulatoria tantum nominet numeretque venam cavam & Aortam, cujus lib. 3. cap. 8. rationem reddit valde infirmam. *Quia effusus, inquit, sanguis in omnes partes secundæ & tertiæ regionis, ibi remanet ad nutritionem, nec refluit ad majora vasa, nisi vi repulsus & inopiâ sanguinis maximâ vasorum majorum, vel impetu percitus affluat ad vasa circulatoria.*

Remanere quidem illam portionem quæ in nutrimentum abire debet necesse est; aliàs enim non nutrirèt, si non in locum deperditi
assimi-

assimiletur & cohæreat unumque fiat : at vero totum influentem sanguinem ibi remanere , ut tantilla portio convertatur , non est necesse : non enim tanto sanguine quantum pars quævis in suis arteriis , venis & porositatibus ubique continet , pro alimento utitur ; neque dum affluat & refluat necesse ut nihil nutrimenti interius relinquat , quare ut nutriat non necesse est ut totus permaneat , sed & ipse doctissimus vir , eodem libello quo hoc affirmat , pene ubique contrarium asseverare videtur ; præsertim ubi circulationem in cerebro describit , & quatenus per circulationem cerebrum remittere (ait) sanguinem ad cor ; & ita cor refrigerari. Quomodo & omnes partes remotæ cor refrigerare dicant-

dicantur, unde & in febribus cum præcordia vehementer ardore febrili torréntur, & æstuant, nudatis artubus, remotis stragulis, refrigerium ægrotantes cordi quærunt: dum ut in cerebro affirmat vir doctissimus refrigeratus sanguis & ardore contemperatus, cor deinde per venas petit, & refrigerat. Unde videtur vir doctissimus necessitatem quandam insinuare, ut à cerebro ita ab omnibus partibus circulationem esse, contra quàm antea apertis verbis dixerat. Sed enim cautè asserit & ambiguè non refluere ex partibus secundæ & tertiæ regionis sanguinem, nisi inquit vi revulsus & maximâ inopiâ sanguinis majorum vasorum, vel impetu affluat ad majora vasa circulatoria, quod verissimum est si vero

vero sensu hæc verba intelligantur : nam per majora vasa, in quibus inopia causat refluxum, puto ipsum intelligere venam cavam, aut venas circulatorias, non arterias : nam arteriæ nunquam deplentur, nisi in venas aut porositates partium ; sed continuè à pulsu cordis infarciuntur, in venam cavam & vasa circulatoria, è quibus cum sanguis cito pede labitur, & ad cor properat, maxima statim inopia sanguinis foret, nisi omnes partes incessanter sanguinem in ipsas effusum refunderent. Adde etiam quod impetu sanguinis intensi & compulsi singulis pulsationibus, in omnibus partibus secundæ & tertiæ regionis contentus sanguis, de porositatibus in venu-las, de propaginibus in majora vasa

B

cogi-

24 *Exercitatio Anatomica I.*

cogitur, & insuper partium circumjacentium motu & compressione: ab omni enim continente compresso & coarctato eliditur contentum: ita motibus musculorum & artuum venarum propagines interobrepentes pressæ & coarctatæ, sanguinem de minoribus ad majora trudent.

Quod sanguis autem in singulas partes continue & incessanter ab arteriis impellitur & impetum facit nec refluat haud dubitandum; si admittatur, quod in singulis pulsationibus arteriæ omnes simul distendantur à propulso sanguine, & (ut ipse vir doctissimus fatetur) diastole arteriarum à systole cordis fiat; neque semel egressus sanguis unquam intra ventriculos cordis regreditur propter

pter occlusas valvulas : si hæc inquam vir doctus ut videtur supponat , manifestum erit in singulis partibus cujuscunque regionis , de infarctu & impetu quibus contentus sanguis vi detrusus propellitur. Nam quo usque pulsant arteriæ eo usque influxus & impetus pertingit : quare in omnibus cujuscunque regionis partibus sentitur , nam ubique pulsus vel in summis digitis & sub unguibus : Nec aliqua particula est in toto corpore , vel phlegmone vel furunculo dolens , quæ lancinantem pulsationis arteriarum motum & solutionem continui tentantem non persentiscat.

Verum amplius, quod ipse sanguis in porositatibus partium regrediatur , in cute manuum &

B 2

pedum

pedum manifestum: quandoque enim, in summo gelu & frigidis temporibus, adeo refrigeratas manus & artus videmus, præsertim puerorum, ut, ad tactum ipsum, glaciei frigiditatem pene referant, adeoque stupore percitas & rigentes, ut vix sensum retineant, nec moveri queant, tamen interim sanguine saturæ, conspiciuntur rubræ aut lividæ; quæ partes recalescere nullo modo possunt, nisi, per circulationem propulso, scilicet, sanguine refrigerato & spiritibus & calore orbato, in ejus, locum ab arteriis influens novus calens & spirituosus sanguis, partes refoveat recalfaciat, motumque & sensum restituat: neque enim igne vel extero calore magis, quam mortuorum membra,

redin-

redintegrarentur ac restituerentur, nisi ab interno influente calido refocillarentur. Re vera iste circulationis præcipuus usus quidem & finis est, cujus gratiâ sanguis suo continuo cursu & influentiâ perpetuâ revolvitur & in circuitum agitur. Nempe ut omnes partes ab ipso dependentes, primò calido innato in vita & suo esse vitali & vegetativo retineantur, & omnia sua munia peragant, dum (ut physiologici loquuntur) ab influente calore & spiritibus vitalibus sustentantur & actuantur: ità duorum extremorum, nempe frigoris & caloris beneficio, corporum animalium temperies, in suâ mediocritate, retinetur. Ut aer enim inspiratus sanguinis nimium fervorem, in pulmonibus & cen-

tro corporis , temperat , fuliginumque suffocantium eventilationem procurat , ità vicissim sanguis æstuans , per arterias in universum corpus projectus , extremitates omnes fovet , nutrit , in vivis sustentat & ab externi frigoris vi extinctionem prohibet.

Iniquum itaque foret & mirum, si singulæ particulæ cujuscunque regionis, transmutatione sanguinis & circulationis beneficio non fruerentur, quarum gratiâ potissimum videtur à naturâ instituta circulatio. Itaque ut concludam, videtis enim quomodo circulatio sanguinis fiat citra confusionem & perturbationem humorum, in toto corpore & singulis particulis, tum in majoribus, tum minoribus vasis, idque ex necessitate, partium-

tiumque omnium beneficio, sine quâ, neque refrigeratæ & impotentes unquam restituerentur, aut in vivis permanerent. Satis quoniam patet omnem influentiam caloris conservantis per arterias adventare & circulationis operâ fieri.

Quare mihi videtur, doctissimum *Riolanum*, cum negat quibusdam partibus inesse circulationem, magis officiosè in suo *Enchiridio* loqui, quam verè; ut scilicet quamplurimis placeret & neminem oppugnaret, & humaniter magis scripsisse, quam, veritatis studio, graviter. Sicut quoque videtur agere, cum sanguinem per septum cordis & incertos quosdam (lib. 3. caput 8.) cæcosque meatus, in sinistrum ventriculum

pervenire maluerit, quam per amplissima & patentissima pulmonum vasa, arteificio valvularum regressum impredientium fabrifacta: rationem impossibilitatis & incommoditatis quam alibi dicit se proposuisse, videre cupio. Mirum esset cum eadem magnitudo, constitutio & fabrica sit aortæ & venæ arteriosæ, si non idem officium: Sed illud valdè improbable, magnum flumen totius massæ sanguineæ per tantillos cæcosque septi mæandros in tantâ copiâ ventriculum sinistrum petere, quæ responderet, tum ingressui à venâ cavâ in dextro latere cordis, tum egressui de sinistro, qui ambo tam ampla requirunt orificia. Sed inconstanter quoque hæc protulit, nam (lib. 3. 6.) pulmones cordi tanquam

quam emunctorium & emissarium constituit, & ait, pulmo afficitur ab isto sanguine transeunte, dum ejus sordes eò confluunt simul cum sanguine. Sic etiam dicit, labem pulmones acquirunt à visceribus intemperatis & malè moratis, quæ suggerunt cordi sanguinem impurum, cujus vitium non potest emendare cor, nisi per multas circulationes. Idem ibidem, circa missionem sanguinis in peripneumonia, & communicatione venarum cum vasis pulmonum contra Galenum dicit. Si verum sit naturaliter sanguinem transire à dextro cordis ventriculo ad pulmonem, ut deducatur in sinistrum ventriculum, indè in aortam; atque si sanguinis circulatio admittatur, quis non videt in affectibus pulmonum, sanguinem majori copia eò confluere & opprimere pulmones, nisi

32 *Exercitatio Anatomica. 1.*

evacuentur primò liberaliter, dein partitis vicibus ad eos sublevandos ; quod fuit consilium Hippocratis, qui in pulmone tumente, ex omnibus corporis partibus, capite, naso, lingua, brachiis, pedibus detrahit sanguinem, ut minuat quantitas, atque revellatur à pulmone, & educit sanguinem donec corpus fuerit exsanguis. Supposita circulatione (inquit ibidem) facilius deplentur pulmones, per venæ sectionem : Si rejiciatur, non video, quomodo sanguis possit inde revelli ; nam si refluat, per venam arteriosam, in ventriculū dextram, obstant valvula sigmoides, & e cordis ventriculo dextro regressum, in cavam venam, sistunt valvulae tricuspidēs. Ergo ; per circulationem exhauritur sanguis, sectis venis brachii & pedis. Simulque destruitur Fernelii opinio, scilicet, in pulmonum affectibus, san-

sanguinem esse potius detrahendum, è brachio dextro quam sinistro, quia sanguis non potest remigrare in venam cavam, nisi ruptis duobus claustris & obicibus in corde positis.

Addit insuper eodem loco (l. 3. cap. 6.) Si admittatur circulatio sanguinis & transeat sæpius per pulmones, non per septum medium cordis, duplex circulatio sanguinis assignanda; una qua perficitur à corde & pulmonibus, dum sanguis, à dextro cordis ventriculo profiliens, traducitur per pulmones, ut perveniat ad sinistrum cordis ventriculum; nam, ab eodem viscere exsiliens, ad idem recurrit, deinde, per alteram circulationem longiorem à sinistro cordis ventriculo emanans, circuit universum corpus, per arterias & per venas ut recurrat ad dextrum cordis ventriculum.

Poterat hic addere doctissimus vir, tertiam circulationem brevissimam, è sinistro nempe ventriculo cordis, ad dextrum, circumagentem portionem sanguinis per arterias & venas coronales, suis ramulis per cordis corpus, parietes, & septum distributas.

Qui admittit, inquit, unam circulationem non potest alteram repudiare. Ità addere potuisset, non potest tertiam denegare. Quorsum enim pulsarent arteriæ coronales in corde, si non sanguinem eo impulsu impellerent? & quorsum venæ (quarum officium & finis est sanguinem ab arteriis ingestum recipere) nisi ut sanguinem è corde tranarent? Adde insuper, in venæ coronalis orificio valvulam (ut ipse vir doctus fatetur lib. 3. cap. 9.) sæpissi-

sæpissimè reperiri ingressum prohibentem, egressui reclinantem: ergo tertiam certè non potest non admittere circulationem, qui alteram universalem & per pulmones quoque & cerebrum (lib. 4. c. 2.) sanguinem transire admittit. Neque enim, in singulis partibus cujuscunque regionis, fieri similiter à pulsu ingressum sanguinis & per venas regressum, omnesque proinde particulas circulationem recipere, haud potest denegare.

Ex his verbis ipsissimis itaque viri doctissimi clarè patet, qualis ipsius est sententia, tum de circuitu sanguinis per universum corpus, tum per pulmones cæterasque omnes partes; nam ipse, qui primam circulationem admittit, apertè patet reliquas non repudiare.

diare. Quî etenim fieri potest, ut, qui circulationem per universum corpus toties affirmaverit & per vasa circulatoria majora, ipse, ullis propaginibus aut ullis partibus, secundæ aut tertiæ regionis, universalem circulationem inesse repugnaret? Tanquam si omnes venæ & majora, quæ vocat, vasa circulatoria, in secunda regione corporis esse, non ab omnibus & ab ipso numerarentur. An per universum possibile est esse circulationem, quæ non per omnes partes? ubi itaque negat titubanter propterea agit & in negationibus vacillat & verba solum dat; hic ubi asseverat, cordatè loquitur & firmis additis rationibus, ut philosophum decet, &, super hanc sententiam, tanquam medicus expertus

tus

tus & vir probus consulit, in periculosissimis morbis pulmonum, extremum sanguinis emissionem esse remedium, contra Galenum & Fernelium suum dilectissimum: ubi si dubitasset, longe absit à tam docto viro Christiano, quod posteris experimenta per mortes, vitæque humanæ discrimina commendaret; aut à Galeno vel Fernelio summæ apud ipsum authoritatis, sine aperta ratione recedere voluisset. Quicquid denegaverit itaque circuitus, vel in mesenterio, vel aliis partibus, sive venarum lactearum, sive veteris medicinæ in gratiam, sive alicujus alterius respectu, id humanitati & modestiæ tribuendum & condonandum est.

Hactenus satis puto manifestè
appa-

38 *Exercitatio Anatomica I.*

apparet, ex ipsius viri clarissimi
verbis & argumentis, circulatio-
nem ubique esse, & sanguinem
ubicunque fuerit locum mutare &
pervenas cor petere; & idem me-
cum doctissimus vir sentire vide-
tur; ideo non opus est, immò su-
pervacaneum foret, huc meas,
quas in libello de motu sanguinis
rationes edidi, ad hujus veritatis
confirmationem ampliore trans-
ferre: quæ, tum ex fabrica vaso-
rum, positione valvularum, aliis-
que experimentis & observationi-
bus desumuntur; præsertim cum
nondum vidi tractatum doctissimi
de circulatione sanguinis, neque
adhuc ulla argumenta viri doctissi-
mi, præter nudam negationem, re-
perio, quibus adductus circulatio-
nem, quam admittit universalem,
in

in plerisque partibus, regionibus
& vasis repudiat.

Verum quidem quod, tanquam
pro subterfugio, ad inveni, ex Ga-
leni autoritate & quotidiana ex-
perientia, de anastomosi vasorum;
sed tantus vir, Anatomicus exper-
tus, curiosus & diligens, prius, de
majoribus arteriis ad venas mayo-
res, anastomoses easque patentes,
visibiles, tantoque torrenti massæ
sanguineæ profluvio gurgites pro-
portionales, & orificiis propagi-
num (quibus aufert circulationem)
maiores patefacere & ostendere
debuisset; antequam notas & pro-
babiliores & patientiores repudia-
ret; ubi sint & qualiter fabrefactæ;
num ad intromittendum tantum-
modo sanguinem in vœnas ido-
neæ, (uti ureterum insertionem in
vesicam

40 *Exercitatio Anatomica I.*

vesicam urinariam cernimus) & non ad remeandum, vel quo alio modo fuissent, tenebatur demonstrare & declarare. Sed (nimis forsitan audacter dico) nec ipse vir doctissimus, nec ipse Galenus, neque ulla experientia, unquam sensibiles anastomoses conspexerunt, aut ad sensum ostendere potuerunt.

Ego quâ potui diligentiam perquisivi, & non parum olei & operæ perdidici, in anastomosi explorandâ, nusquam autem invenire potui vasa invicem, arterias scilicet eum venis, per orificia copulari: libenter ab aliis discerem, qui Galeno tantum ascribunt, ut ad verba ejus jurare ausi sint. Neque in jecore, liene, pulmonibus, renibus, aut aliquo viscere est aliquis anastomosis, licet in illis coctis, usque

usque quò friabile totum redderetur parenchyma, &, tanquam pulvis, ab omnibus vasorum fibris esset excussum & acu detractum, ut omnes cujusvis divaricationis fibras, omnia capillamenta evidenter cernere potuerim. Audacter igitur affirmare ausus sum, neque anastomoses esse vel venarum portæ cum cava, arteriarum cum venis, aut pori cholidochi capillarium ramulorum, qui, per totam hepatis sinam, disperguntur cum venis. Hoc solummodo in jecore recenti observare licet, omnes propagines venæ cavæ, per gibbam hepatis perreptantes, tunicas habere infinitis puncticulis cribrosas, tanquam in sentina, ad decumbentem sanguinem recipiendum fabrefactas. Portæ rami
non

non similiter se habent, sed in propages divaricantur, & ut utraque distributio horum vasorum, hujus in sima parte, illius in gibba, ubique ad externam usque visceris umbonem excurrunt sine anastomosibus.

Tribus, duntaxat, in locis quod æquipollet anastomosi reperio. In cerebro, è soporalibus arteriis in basin per reptantibus, frequentes & implexæ fibræ oriuntur, quæ plexum choroidem postea efformant, & ventriculos transeuntes, tandem in sinum tertium, qui officio venæ fungitur, unitæ desinunt. In vasis spermaticis, præparantibus vulgo dictis, arteriolæ è magna arteria deductæ, venis, dictis præparantibus, quas comitantur, adhærent, & tandem intra tunicas illa-

illarum ità recipiuntur, uti ultima quasi eadem habentes: adeo ut, ubi ad testiculorum particulam superiorem, coniformem processum, corpus varicosum & pampiniforme dictum, desinunt, incertum planè sit an venæ an arteriæ an utriusque fines æstimemus. Pariter & arteriarum, venam umbilicalem adeuntium, ultima stamina in venæ illius tunicis oblitterantur.

Quid dubitandum, si per tales voragines, arteriæ magnæ ramuli, distenti sanguinis impulsu & infarctu, deplerentur tam magno & conspicuo torrenti? sensibiles saltem & visibiles transitus, vortices & gurgites, natura non denegasset, si omnem sanguinis fluxum eo divertere, & proinde minores propagines & partes soli-

dar

44 *Exercitatio Anatomica I.*

das, si influxus beneficio omnino privatus esse, voluisset.

Denique, hoc unum experimentum commemorabo, quod, ad anastomoses declarandas & eorum (si qui sint) usum & ad transitum sanguinis de venis in arterias, per illas vias, & regressum extendendum, sufficiens esse videtur.

Aperto pectore cujusvis animalis, & ligatâ venâ cavâ juxta cor, adeo ut nihil illâc in cor inigret, & confestim rescindantur arteriæ jugulares, illæsis venis, utrinque. Si inde arterias, datâ portâ inanitas conspexeris, & non pariter venas, manifestum fore arbitror, nullibi sanguinem è venis in arterias, nisi per cordis ventriculos derivari. Alioquin enim venas, ex illarum arteriarum effluvio (ut notavit Galenus)


lenus) brevissimo spatio temporis, similiter ac arterias, sanguine destitutas cerneremus.

Quod restat Riolane, & mihi & tibi ipsi gratulor, mihi ob sententiam quâ circulationem exornasti, tibi etiam, ob librum doctum, politum, succinctum, quo nil magis elegans, mihi transmissum, gratias habeo amplissimas; laudesque meritas referre & debeo & cupio; me autem tanto oneri imparem esse fateor: plus enim dignitatis Riolani nomen subscriptum, quam encomia mea (quæ velim maxima) Encheiridio allaturum scio. Vivet in æternum celebris libellus, nominisque tui gloriam (pereunte etiam in marmore) posteris enarrabit. Anatomien pathologiæ summâ cum gratiâ conjunxisti,


46 *Exercitatio Anatomica I.*

junxisti, osteologiâ novâ utilissimâ magno cum fructu locupletasti, maxtè istâ virtute vir insignissime, & me ama, qui te foelicem simul & longævum, & ut omnia tua celeberrima scripta sempiternæ laudi tibi sint, exoptat.

Gulielmus Harveus.



Exerci-



Exercitatio altera

A D

J. RIOLANUM

In qua multe contra Circuitum sanguinis objectiones refelluntur.

L A B O R I S mei partem multis retrò abhinc annis (Doctissime Riolane) obstetricante prælo, in lucem edidi. Nullus verò prope-modum exstitit dies, à circuitu sanguinis natali, nec minutissimum decursi temporis spatium, in quo non benè & malè de circulatione à me inventa audivi: Alii tenelulum

C

lulum

lulum adhuc infantem convitiis lacerant, tanquam luce indignum, alii contrà alendum esse foetum, dijudicant, scriptisque meis favent & tuentur; illi magno cum fastidio opugnant, hi ingenti cum applausu patrocinantur: hi me abunde experimentis, observationibus & autopsia confirmasse circuitum sanguinis, contra omnem argumentorū vim & impetū existimant, illi vix adhuc satis illustratum putant, & nondum ab objectionibus vindicatum. Sunt autem, qui me inanem vivarum dissectionum gloriam affectasse clament, & ranas, serpentes, muscas aliaque viliora animalia in scenam adducta, levitate puerili vituperant & irrident, nec à maledictis abstinēt. Maledicta autem maledictis

ledictis rependere indignum philosopho & veritatem inquirenti judico; satius & consultius fore arbitror, tot malorum morum indicia, verarum luculentarumque observationum luce, diluere.

Ne oblatrent canes, aut suam ne evomant crapulam, aut ne inter philosophorum turbam annumerentur quoque cynici, non devitandum est: verum ne mordeant, aut vesanâ suâ rabie inficiant, vel canino dente rodant ipsa veritatis ossa & fundamenta, cavendum est.

Vituperatores, momos, scriptoresque convitiis labe fordidos, ut, nunquam legendos mecum statui, (à quibus nihil solidum aut præter maledicta egregium sperandum) ità multo minùs responsione dignos judicavi. Utan-

tur suo malo genio, vix unquam benevolos lectores habituros puto; neque (quod præstantissimum & maximè optandum) sapientiam donat Deus optimus improbis, pergant maledicendo, donec ipsos (si non pudet) pigeat, vel denique tædeat.

Ad viliorum animalium inspectionem cum Herachlito apud Aristotelem in casam furnariam (sic dicam) introire si vultis, accedite, nam neque hic Dii desunt immortales; maximusque omnipotens pater in minimis, & conspectior vilioribus quandoque est.

In libello de cordis & sanguinis motu in animalibus, illa tantùm adhibui ex multis aliis observationibus meis, quibus aut errores redargui, aut veritatem satis stabilitam,

tam, iri arbitrabar; plurima alia, dissectionis ope, sensu perceptibilia, tanquam redundantia, & inutilia dereliqui; quorum quædam in gratiam studiosorum, qui illa efflagitant, paucis verbis nunc addam. Tantum valet apud omnes Galeni magna autoritas, ut multum hæsitare video nonnullos, circa experimentum illius, de ligatura arteriæ super fistulam, intra cavitatem immissam, quo demonstretur pulsum arteriarum fieri à facultate, per tunicas à corde transmissas, & non à sanguinis intra cavitates impulsu, & proindè arterias dilatari ut folles, non ut vires.

Hoc experimentum memoratur à Vesalio, viro Anatomes peritissimo, sed neque Vesalius, ne-

52 *Exercitatio Anatomica II.*

que Galenus dicit, experimentum hoc fuisse ab illis, sicut à me probatum; tantummodo præscribit Vesalius, consulitque Galenus veritatis indagandæ studiosis, quò certiores fierent, non cogitans aut intelligens, difficultatem illius operis, neque, cum fit, vanitatem: quandoquidem, licet omni diligentia administretur, nil tamen pro illius opinionis confirmatione facio; quæ pulsus causam esse tunicas asseverat: sed magis declarat ab impulsu sanguinis concitari. Nam super calamum aut fistulam quamprimùm vinculo arteriam strinxerit. supra ligaturam arteria statim sub impulsu sanguinis deluper impacti, dilatatur, ultra orbem fistulæ, undè & fluxus inhibetur & impetus refringitur; ità ut
arte-

arteria vinculo subdita obscure admodum pulset, quia est sine impetu transeuntis sanguinis, eo quod suprà ligaturam reverberatur: sin verò intra fistulam abscissa arteria fuerit, videre licebit contrarium ex saltu sanguinis projecti & per fistulam impulsu, sicut solet evenire (ut in libello de sanguinis motu notavi) in aneurismate, ab exesist arteriæ tunicis, hoc (intra membranas cum continetur sanguis) non ex tunicis arteriæ dilatatis, sed ex circumpositis membranis & carne, cuiusdam præternaturaliter factam continentem habere aneurisma, pulsare valde exiliter senties, quando superius, (& præsertim in aneurismate ipso) pulsus magni & vehementes apparent;

54 *Exercitatio Anatomica II.*

quanquam ibi pulsationem & dilatationem fieri, ab arteriarum tunicis, aut facultate cystæ communicatâ, fingere non possumus, sed planè ab impulsu sanguinis.

Sed enim, quo Vesalii error & aliorum inexperientia appareat evidentior, qui asserunt (ut opinantur) partem fistulæ subditam non pulsare ligato vinculo, expertus dico, subditam partem pulsaturam, si rectè fiat experientia, & cum solveris vinculum, ubi asserunt subditas arterias repulsare, aio, minùs pulsare partem subditam soluto, quam stricto vinculo.

~~Verum sanguis~~
 filientis effusio omnia perturbat & irritum experimentum & vanum reddit: adeò ut nil certi ob impetum sanguinis, ut dixi, demonstrari

strari possit. Sin verò (quod experientia mihi cognitum est;) renudaveris arteriam & digitis compressis detinueris rescissam partem, poteris, ex arbitrio, multa tentare, ut veritas planè tibi elucescat: primùm, singulis pulsibus allisum sanguinem in arteriam descendentem persenties, quo arteriam dilatari videbis. Poteris quoque sanguinem, pro libitu tuo, exprimere & dimittere: si exilem partem orificii laxaveris, singulis pulsibus subsultu ejaculari, & quæmadmodum diximus in arteriotomia aut perforatione cordis, singulis contractionibus cordis sanguinem ejici, in arteriæ dilatatione, manifestum erit perscrutanti.

Quod si toto & continuo fluxu perpetim emanare siveris, & sive

per apertum canaliculū five aperto orificio erumpere permittas, in ipso flumine tum visu, tum tactu (si manū applicueris) omnes ictus cordis, omnemque ejus rithmum, ordinem, vehementiam, intermissionemque per senties; haud aliter quam si in volam manus per syphonem diversis & variatis ejaculamentis, projectam aquam percipere liceret, sanguinem exilientem variato impetu & inæquali, tum visu tum motu percipies: tanto quandoque impetu ex rescissa arteria jugulari erumpentem observavi, ut sanguis manui allisus, per quatuor vel quinque pedes, refractus reverberatusque resiliret.

Sed quò clariùs, quod in dubio est, appareat, pulsificam vim non per arteriarum tunicas à corde
mana-

manare, habeo, è Nobilissimi viri
cadavere, arteriæ descendentis
portionem, cum duobus crurali-
bus ramis, spithamæ longitudine,
exemptam, in os fistulosum con-
versam; per cujus cavum, dum vi-
vebat Nobilissimus vir, descen-
dens arteriosus sanguis in pedes,
subditas arterias suo impulsu agi-
tabat; in quo tamen casu, arteria
idem passa, tanquam si super cana-
liculum fistulosum constricta & li-
gata foret (secundum Galeni ex-
perimentum) ut neque dilatari, eo
loci, neque arctari, ut foliis, neque
vim pulsificam à corde inferiori-
bus & subditis arteriis derivare,
aut per soliditatem ossis diducere
facultatem, quam non susceperat,
potuerit. Nihilominus inferioris
arteriæ pulsus agitari in cruribus

& pedibus, optime memini, dum vivebat, me sæpissime observasse; fui enim ipsi medicus assiduus, ille mihi amicus necessitudine conjunctissimus. Quare in illo nobilissimo viro, necesse inferiores arterias ab impulsu sanguinis, ut utres, dilatatas fuisse, non, ut folles, ab expansione tunicarum; siquidem, idem inconveniens, eademque interceptio facultatis pulsificæ, necesse est ut obveniat, tunicæ arteriæ in calamum & tubulum osseum totaliter conversæ, quæ super calamum & tubulum osseum constrictum, quò minùs arteriæ subditæ pulsarent.

Alio quoque viro nobilissimo & fortissimo, aortam partemque magnæ arteriæ juxta cor in os rotundum conversam novi. Ita Galeni

leni experimentum , vel saltem
ejus analogon, quod industriâ non
inventum , casu repertum , satis
manifestum facit, interceptionem
pulsificæ facultatis constrictione
vel ligatura tunicarum arteriæ non
impediri , ut indè arteriæ subditæ
non pulsent : atque si ritè à quovis
(quod præscribit Galenus) fieret
experimentum , quam opinionem
Vesalius indè confirmatam iri spe-
raverat, redargueret. At non pro-
pterea omnem motû etiam tunicis
arteriarum denegamus, sed, quem
cordi tribuimus, concedimus , ni-
mirum coarctationem & systolem
& à distentione ad constitutionem
naturalẽ regressum, ab ipsis tunicis
fieri. Sed hoc annotandum , non,
ab iisdem, dilatari & coarctari, sed
diversis causis & instrumentis , ut
in

in motu omnium partium & ipso quoque corde observare licet. Ab auriculâ hoc distenditur, à se ipso contrahitur; ita arteriæ à corde dilatantur à se ipsis subsidunt.

Poteris & aliud experimentum eodem tempore facere. Si duo acetabula ejusdem mensurę repleveris, alterum arterioso profiliente sanguine, alterum venoso ex vena ejusdem animalis extracto, poteris sensu statim & postea, cum coagulati refrixerint ambo sanguines, quamnam sit differentia, inter utrumvis, observare: contra eos, qui aliam speciem sanguinis in arteriis fingunt, quam in venis; nempe quia in illis floridiorem, & nescio quomodo, spiritu copiosam ebullientem, efflatum, (ad exemplum lactis aut mellis super ignem effer-

effervescentis & intumescentis) amplio-rem locum replentem faciunt.

Si namque sanguis, è sinistro cordis ventriculo in arterias impulsus, adeò in spumofam & fufflatam naturam fermentaretur, ut una aut altera gutta totum aortæ cavum distenderet, procul dubio, detumefcente illâ fermentatione, ad quantitatem guttarum quarundam rediret (quam causam assignant aliqui, cur, in mortuis, inanitæ arteriæ reperiantur) & idem, in cotylâ arterioso sanguine plenâ, conspiceretur. Ita enim & in lacte & in melle refrigeratione obvenire experimur. Quod si in utrâvis cotylâ sanguis eodem pene colore, & non multum dissimili consistentiâ coagulatus fuerit, similiter
& se-

& serum exprimens , & pariter si utramque mensuram , dum calet & dum friget , compleverit , sufficiens erit cuivis , ad fidem faciendam & ad quorundam insomnia rejicienda , puto argumentum : neque aliam speciem esse , sinistro quam dextro cordis ventriculo , sanguinis , (sicut & sensu indagare poteris & ratione :) proportionabiliter enim venam arteriosam unâ spumante guttâ distentam confirmatum deberet & proinde eundem & similiter effervescentem & fermentantem sanguinem dextro quam sinistro ; quandoquidem ingressus venæ arteriosæ & aortæ egressus equipollens & equiparabilis est.

Tria potissimum apta sunt ad hanc opinionem inducendam de
diver-

diversitate sanguinis: unum, quod arteriotomiâ floridiorum sanguinem extractum vident: alterum, quod in dissectione corporû mortuorum, tam sinistrum ventriculum cordis, quam arterias omnes adeò inanitas, reperiunt: tertium, quod sanguinem arteriosum spirituosiore & spiritibus repletum intelligunt, & ità majorem multò locum occupantem cogitant: quorum omnium causas & rationes, quibus ea sic apparent, ipsa inspectio prodit.

Primum quod ad colorem pertinet, semper & ubique exiens sanguis per angustum foramen quasi percolatur & tenuior est levior pars, quæ supernatare solet, magisque penetrativa est, eliditur: sic in phlebotomia, sanguis ma-
jori

64 *Exercitatio Anatomica II.*

jori fluxu aut vi erumpens è majori orificio longiusque profiliens crassior, corpulentior & colore obscuriore est: sin ex parvulo foramine & angusto & guttatim emanaverit (ut solet è vena solutâ ligaturâ) floridior, tanquam enim transcolatur, & exit pars solummodo tenuior & penetrativa magis, ut in hemorràgia narium, vel extractus per hirudines, vel cucurbitulas, vel quovis modo per diapedesin exiens, floridior cernitur: quia tunicarum crassities, duritiesque angustior redditur, nec adeò facilè reclinans, ut exeunti sanguini viam præbeat, & perinde quoque contingit obesis corporibus, cum ex pinguedine subcutaneâ, venæ orificium opprimitur, sanguis tenuior & floridior & tanquam

quam arteriosus apparet. Ex ad-
verso si sanguis è rescissâ arteriâ li-
berè profluens acetabulo accipia-
tur, venosus apparebit; multò flo-
ridior sanguis in pulmonibus, &
exindè exprimitur, quam in arte-
riis reperitur.

Vacuitas arteriarum in corpori-
bus mortuis (quæ forsan imposuit
Erasistrato, ut arterias spiritus tan-
tum aërios continere existimaret)
indè evenit, quod quandò subsi-
dent (meatibus occlusis) pulmo-
nes, non ulterius respirant, ità per
ipsum sanguis liberè non potest
transire, perseverat tamen per
temporis spatium cor in expellen-
do, unde & sinistra cordis auricula
contractior & ventriculus, pari-
terque arteriæ inanitæ & non, san-
guinis successione, repletæ, vacuæ
appa-

apparent : sed, si simul cor pulsare cessaverit & pulmones respirando transitum præbere, ut in iis, qui aqua frigida submersi suffocantur, aut syncope & morte subitanâ extinguuntur, pariter repletas venas & arterias reperies.

Quod ad tertium attinet de spiritibus, quinam sint, & qualiter in corpore & quali consistentia, an separati & distincti à sanguine & partibus solidis, an commisti, tot tamque diversæ opiniones sunt, ut non sit mirum, spiritus, quorum natura in ambiguo ità relinquitur, communi ignorance subterfugio inservire. Vulgò enim scioli, cum causas assignare haud norunt, utunt statim à spiritibus hoc fieri & omnium opifices spiritus introducunt; & uti mali Poëtæ, ad fabulæ expli-

explicationem & catastrophem,
Θεὸν ἀπομνηστὴν advocant in sce-
nam.

Fernelius & alii, spiritus aërios,
& invisibiles substantias, suppo-
nunt ; probat enim esse spiritus
animales (eodem modo quo Era-
sistratus in arteriis) quia in cere-
bro cellulæ reperiuntur, quas, cum
non datur vacuum, spiritu in vi-
vis repleri concludit. Tota tamen
schola Medicorum, tres spirituum
species constituit, naturales per
venas, vitales per arterias, & per
nervos animales tranari spiritus :
unde dicunt Medici, ex Galeno,
quandoque partes cerebri consen-
su laborare, quia prohibetur facul-
tas cum essentia, id est, spiritu,
quandoque citra essentiam. Insu-
per, præter influentes has tres or-
dines

68 *Exercitatio Anatomica II.*

dines spirituum, totidem implantatos videntur asserere. At nos neque in venis, nervis, arteriis aut partibus vivorum, dissectionibus explorando invenimus. Alii corporeos spiritus faciunt, alii incorporeos, & qui corporeos volunt, quandoque sanguinem vel sanguinis tenuissimam partem, copulam animæ, quandoque in sanguine contentos (ut in nidore flamma) continuo fluore spiritus sustentatos subintelligunt, quandoque sanguini contradistinctos. Qui spiritus incorporeos affirmant non habent ubi insistant; sed & per potentias spiritus agnoscunt, ut spiritus concoctivos, chylicativos, procreativos & tot spiritus quot facultates aut partes.

Sed & scholastici, spiritum fortitu-

titudinis , prudentiæ patientiæ ,
omniumque virtutum , & spirituum
sapientiæ sanctissimum connume-
rant , omneque donum divinum.
Malos item & bonos spiritus, affi-
stere, possidere, deferere, vagari
susplicantur. Morbos à cacodæmo-
ne, tanquam à cacochinnia, opi-
nantur causari. Sed enim, quan-
quam nil magis incertum & du-
bium quam, de spiritibus, doctri-
na tradita, tamen, ut plurimum
omnes, medici cum Hippocrate
concludere videntur, quæ corpus
nostrum ex tribus compositum
voluit partibus, continentibus,
contentis & impetum facientibus,
per impetum facientes spiritus in-
terpretantur. At si pro impetum
facientibus, spiritus intelligendi,
quicquid in vivis corporibus vim
habet

habet & impetum agendi, spiritus nomine compellaretur. Nec ideo omnes spiritus sunt aëriæ substantiæ, nec potentiæ, nec habitus, ut neque incorporei.

Sed quod ad propositū nostrum præcipuè spectat, omisso aliorum omnium significationum tædio, spiritus, per venas aut arterias excurrentes, à sanguine non separantur, ut nec flamma à nidore inflammabili; sed sanguis & spiritus unum & idem significant, diverso esse, ut vinum generosum & spiritus ejus. Nam uti vinum ulterius vinum non est (amisso omni spiritu) sed vappa, aut acetum, ita neque sanguis sine spiritu sanguis est, sed æquivocè cruor; veluti manus lapideus aut mortuus non amplius manus est, ita nec sanguis
fine

sine spiritu vitali, sanguis, sed corruptus statim censendus, si spiritu destitutus fuerit. Spiritus itaque qui arteriis & sanguini arterioso præcipuè inest, aut actus ejus est, sicut vini spiritus in vino, & aquæ vitæ spiritus, aut sicut flammula in vini spiritu accensa, & sese nutriendo vivens.

Igitur sanguis, cum plurimùm spiritibus imbuitur, non quod illis turget, aut fermentatur, aut inflatur, ut majorem locum desideret, & requirat (quod experimento allato per acetabulorum mensuram certissimè dijudicare poteris) sed sicut vinum, majoribus viribus, & impetu agendi, & efficiendi quo pollet, secundum mentem Hippocratis intelligendum.

Idem itaque, sanguis, in arteriis,

D

riis,

riis, qui venis est, licet spirituosior agnoscat, & majori vi vitali pol- lens: non autem in quid magis ae- rium convertitur, aut vaporosior redditur; quasi nulli essent spiri- tus, nisi aerii; aut nullum impe- tum faciens, præter flatus, & ven- tositates: Sed neque spiritus ani- males, naturales, vitales, qui in so- lidis partibus, videlicet, ligamen- tis & nervis (præsertim si tot spe- cies) inhabitant, intrâ cœcos me- andros contenti, tot aeris diversæ formæ, aut vaporum species arbi- trandi.

Qui spiritus, in corporibus ani- malium, corporeos agnoscunt, sed consistentia aeris, vel vaporosâ, vel flammeâ, ab illis scire libenter velim, An sine sanguine, hûc, il- lûc, transire, refluere, & vagari
tan-

tanquam corpora distincta possint? An inquam sanguinis motum sequantur spiritus, tanquam vel sanguinis partes sint, vel indissolubili connexu, & interruptâ exhalatione alligati: adeo ut neque derelinquere partes possint, neque transire sine sanguinis influxu, & refluxu & transitu:

Si enim, ut vapores aquæ calore attenuati, spiritus ex sanguine, continuo fluore & successione, partium existunt pabulum, sequi necesse est, neque à pabulo remotos manere, sed in continuâ evanescentiâ proindè, neque influere, neque refluere, neque transire quavis, neque permanere, sine sanguine influente, refluxente, transeunte, tanquam eorum vel subiecto, vel vehiculo, vel pabulo.

D 2 Deinde

Deinde scire ab illis velim, qui spiritus in corde fieri docent, & ex vaporibus, vel exhalationibus sanguinis, (sive calore cordis sive concussionem) suscitatis, & aere inspirato permiscentes componunt. An non tales spiritus, sanguine frigidiores multò sint æstimandi: quandoquidem partes ambæ, ex quibus componuntur frigidiores multò sint, aer videlicet & vapor: vapor enim aquæ ferventis, multò ipsâ aquâ tolerabilior, flamma quævis minùs comburens quam carboclychnii, & carboligni quam ferrum, aut æs candens.

Unde videtur magis, spiritus hujusmodi, calorem suum à sanguine acceptum referre, quam sanguinem à spiritu incalescere: & tales spiritus potiùs fuligines, & efflu-

effluvia excrementia sanguinis, & corporis (veluti odores) quam naturales censendos opifices, præsertim cum tam citò, virtutem (si quam habent à sanguine, suo origine acceptam) amitterent, fragiles adeò & evanidi existentes.

Unde quoque probabile foret, pulmonum expirationem esse, quâ his efflatis, eventaretur & depuretur sanguis: atque inspirationem esse, ut sanguis pertranseundo inter ventriculos duos cordis, contemperetur, ambientis frigore: nè excandescens, & intumescens, quadamque fermentatione inflatus, (sicuti effervescent mel & lac) adeo distenderet pulmonem, ut suffocaretur animal: quemadmodum sæpiùs in periculoso asthma-te vidimus, quò etiam Galenus

76 *Exercitatio Anatomica II.*

causam refert, cùm dicit, ab obstructis levibus arteriis illud contingere: videlicet vasis venosis & arteriosis. Hoc sum expertus, à suffocationis asthmaticæ sũmo discrimine, cucurbitis affixis & multà subito gelidà affusâ aquâ, liberatos fuisse non paucos. Hæc forsan satis superque de spiritibus hoc loco, quos definire, & docere, quid sint, & quales, in tractatu physiologico debemus: tantum addam.

Qui de calido innato, tanquam naturæ ad omnia communi instrumento, tractant & influentis caloris, ad omnes partes fovendas & invita retinendas, necessitatem docent, atque non sine subjecto existere agnoscunt, quia ob celeritatem influxus & refluxus (animi pathematibus præsertim) hujusque calo-

caloris motum velocem, corpus mobile non proportionabile reperiunt, spiritus introducunt, tanquam corpora subtilissima, maxime penetrativa, & mobilia, & haud aliter, quam operationum naturalium divinitatem mirabilem, ab illo communi instrumento videlicet calido innato provenientem efferunt: illos spiritus, sublimes lucidos, æthereos, cœlestis naturæ, divinos, vincula animæ, esse consimiliter comminiscuntur; veluti vulgus imperitorum, quorum operum causas non capiunt, Deos immediatos authores opinantur & prædicant.

Uude calorem influentem, in singulas partes perpetim per spiritus influxum, idque per arterias adventantem, decernunt, tan-

quam si sanguis, nec tam citò moveri, nec penitus insinuari, nec tantopere fovere potuisset. Eoque provecti sunt hujus opinionis fiducia, ut contentum in arteriis sanguinem esse negent.

Et levissimis argumentis conantur astruere, sanguinem arteriosum specie differentem esse, vel aeriis hujusmodi spiritibus, repletas esse arterias, & non sanguine, contra ea omnia, quæ Galenus adversus Erasistratum, tum ab experientia, tum ratione, attulit.

Verum enim verò, sanguinem arteriosum, non ità differre, superiori experimento, & sensu, satis manifestum; de sanguinis influxu & spiritus non separati à sanguine, sed, ut ejusdem corporis, per arterias

rias influerè, sensus quoque facere potest pariter manifestum.

Observare licet, quando & quoties extrema manus, pedes vel auriculæ, rigent & frigent, & influente calore rursus restituntur, quod simul contingant colorari & cal fieri & repleri, venasque antea exiles & oblitteratas ad apparentiam tumefieri: unde & quandoque cum subitò recalescunt, dolore afficiuntur partes: ex quibus apparet, id, quod influxu suo calorem advehit, idem esse quod replet & colorat: hoc autem præter sanguinem nihil aliud esse potest, sicut antè demonstratum est.

Longiori discissâ arteriâ & venâ, quivis sensu percipere evidentè potest, cum viderit partem venæ citiorem, versus cor, nihil

sanguinis emittere; partem verò ulteriorem profundere copiosum & nil præter sanguinem, (qualiter postea, pag. 85. in experimento meo commemorato in jugularibus internis factò) Contrâ rescissâ arteriâ, sanguinis parùm, ex parte ulteriore dissectâ manat, ceterior vero pars, tanquam è syphone, violento impulsu merum sanguinem ejaculat.

Quo experimento constat, quâ transitus in utrisque sit, an hac, an illac; constat item, qua velocitate, quo motu sensibili, non sensim & guttatim, qua violentiâ insuper. Sed ne quis subterfugiendo prætendat spiritus invisibiles; dimittatur orificium vasis dissecti in aquâ, vel oleum: si enim quidpiam exiret aereum per bullas erumperet
visi-

visibiles. Hoc enim modo, crabrones, vespas, & hujusmodi insecta, in oleo demersa & suffocata, ultimò aeris bullulas è caudâ, dum emoriuntur, emittunt, undè ità respirare vivos non est improbabile.

Animalia enim omnia, aqua submersa & suffocata ultimò, cum profunduntur & subsidunt, bullulas, ex ore & pulmonibus, emitte-
re solent, cum spiritum reddunt.

Constat denique eodem experimento, in venis valvulas ità exactè claudi, ut aer inflatus non penetret, multò minùs sanguis. Constat inquam sensu, neque sensibilibiter, neque insensibiliter, neque sensim, neque guttatim, sanguinem per venas à corde elongari.

Et ne quis tandem eò confugeret, ut dicat, hæc ità esse cum tur-

82 *Exercitatio Anatomica II.*

batur natura, & præternaturaliter constituta sit, non verò cum sibi relicta liberè agat. Quandoquidem in morboſa & præternaturali constitutione, eadem apparent, quæ in naturali, & ſano ſtatu; dicendum & exiſtimandum non eſt, quod ſi, diſciſſâ venâ, tantum ſanguinis ex ulteriori parte emanare videatur, id præter naturam fieri, quia turbatur natura: non enim diſſectio partem citeriorem claudit, quo nihil exinde exeat, nec exprimi queat, ſive turbatur natura ſive non. Alii ſimiliter contendunt dicendo, quanquam abſciſſâ arteriâ propè cor, in tantâ copiâ ſingulis pulſibus prorumpat ſtatim ſanguis, quod non propterea ſemper cor integrum, integrâ arteriâ, pulſu pellat. Veriſimilius tamen
eſt,

est, omnem pulsum aliquid impellere, neque posse sine alicujus contenti impulsu, pulsum continentis esse. Tamen hoc quidam, quò se defenderent & circulationem vitarent, non verentur affirmare & asseverare, arterias videlicet, in viventibus & secundum naturam sese habentibus, adeò plenas, ut ultrà ne grana sanguinis admittere valeant, & consimiliter de cordis ventriculis. Sed extra dubium est, quodocunque & quousque dilatari & contrahi, arteriis & ventriculis conceditur, recipere posse ulteriùs sanguinis aliquid impulsu, idque ultrà multa grana, debere. Nam si ventriculi ità distenti sint (ut vidimus quandoque in anatomia vivorum) quoad nil ampliùs sanguinis admittant, restitat

cor

84 *Exercitatio Anatomica II.*

cor à pulsu, & tensum renitensque permanens, suffocatione mortem inducit.

Sanguis dum movetur, an attrahatur, an impellatur, an suâ intrinsicâ naturâ sese moveat, satis, in libello de motu cordis & sanguinis, dictum est: ut & de actione, functione, dilatatione, contractione cordis, qualiter fiat, & simul cum arteriarum diastole: ut, qui exindè argumenta contradicendi sumant, quæ dicta sunt, vel non intelligere, vel nolle visu rem explorare, videantur.

Haud quidquam puto in corpore attractum demonstrari posse nisi alimentum, successione partium sensim in loca deperditi, sicut lucernæ oleum a flamma.

Unde, omnis attractionis sensibilis

bilis & impulsione, commune organum primum illud est, quod nervi habet naturam, vel fibræ, vel musculi; nempe ut sit contractile quod (seipsum contrahendo) abbreviare possit, & ideò tendere, adducere, aut propellere: sed hæc fusiùs & apertiùs alibi in organis animalium motoriis declaranda.

Adeo iis qui circulationem repudiant, quia neque efficientem neque finalem causam vident, cui bono fiat, quia adhuc nihil adjunxi, restat demonstrandũ. Prius in confesso esse debet, quod sit circulatio, ante quam propter quid fiat, inquirendum: nam ex iis, quæ in circulatione & hâc positâ obveniunt, usus & utilitates, investigandæ sunt. Interim dicam, quod sunt in Physiologia, pathologia

86 *Exercitatio Anatomica II.*

logia , & therapeia recepta , quorum causas , non novimus, esse tamen nullus dubitat ; videlicet, febrium putridarum, revulsionis, & purgationis excrementorum ; ea omnia , tamen, circuitus beneficio intelliguntur.

Quicunque itaque circulationem controvertuntur , eò quod problemata medicinalia (stante circulatione) solvere non possint ; aut in morbis curandis, & medicamentis usurpandis , apparentium causas exinde colligere nequeant ; aut causas receptas a præceptoribus falsas esse videant ; aut approbatas priùs opiniones relinquere indignum putent ; & per tot sæcula traditam disciplinam, veterumque auctoritatem, in dubium vocari nefas existiment.

His

His omnibus respondeo, naturæ opera facta manifesta sensui, nullas opiniones, nullamque antiquitatem morari: naturâ enim nihil antiquius, majorisque auctoritatis.

Ad ea, problemata non solvenda (uti putant) è medicinalibus observationibus, tanquam impedimenta sanguinis circulationi obijciunt, suosque errores declarandos opponunt (scilicet) stante circuitu phlebotomiâ non revelli, cum sanguis nil minùs parti affectæ impellatur: excrementorum pravorumque humorû transitum, per cor nobile viscus & principale metuendum: effluxum excretionemque mirantur, cum quandoque ex eodem corpore, diversis partibus, iminò ex eodem foramine,

88 *Exercitatio Anatomica II.*

ne, eodemque tempore, nonnunquam malus & corruptus sanguis egreditur; cum, si continuo fluxu sanguis agigaretur, per cor transiens permisceretur concussus: hæc & hujusmodi plurima, è medicorum schola prolata, quæ fieri possint dubitant nam repugnare videntur, quo minus circulatio admittatur. Neque satis factum opinantur (sicut in Astronomiâ) nova systemata ordinare, nisi omnia phænomena solvant.

Non aliud hoc loco respondere visum est, quam circulationem non eandem, ubique & semper, esse; sed multa contingunt, ex sanguinis motu velociori vel tardiori, cordis propellentis robore & infirmitate, sanguinis copia, conditione, vel constitutione,

tione, partium densitate, obstructione & similibus. Craffior sanguis per angustos meatus ægriùs transit, pertrânsiens per jecoris parenchyma magis transcolatur, quam per pulmonum.

Non pari cursu, per carnis & parenchymatis rariorem texturam tranatur, ac per nervosarum partium compactam consistentiam. Tenuior enim & purior, & spirituosior pars, citiùs permeat, craffior, terrestrior & cacochymica, diutiùs subsistens, repudiatur: pars nutritiva & ultimum alimentum, sive ros, sive cambium, magis penetrativa est (siquidem ubique apponenda, vel ipsis cornibus, plumis, unguibus, pilis denique) si omniquâque enutritæ secundum omnes dimensiones augmentantur:

90 *Exercitatio Anatomica II.*

tur: excrementa quibusdam locis propterea fecernuntur & coagulantur & aggravant, aut concoquantur: Neque excrementa, vel pravos humores, semel segregata, neque lac, pituitam, sperma, neque ultimum alimentum (rorem & cambium) cum sanguine revolui necesse puto, sed adhærere quod nutrit, ut agglutinetur, oportere. De quibus omnibus, plurimisque aliis, in propriis locis determinandis, & declarandis, nempe Physiologiâ, reliquisque artis medicinæ partibus: nec de circulationis sanguinis consequentibus, inconvenientiis, vel convenientiis, convenit disputare, priusquam ipsa circulatio stabilita sit, & pro concessio admittatur.

Astronomiæ exemplar non hic imitan-

imitandum est, ubi ex apparentiis duntaxat, & ipso quod sit, causæ & ipsum propter quid investiganda veniunt. Sed sicut quis eclipses causam perquirens, supra lunam sisteretur, ubi sensu causam discerneret, non ratiocinio sensibilibus, quæ sub sensum cadunt, nulla alia certior demonstratio ad fidem faciendam adduci poterit, quam sensus & *αὐτοψία*.

Aliud experimentum insigne, apud omnes studiosos veritatis, cupio exploratum, quo & pulsus arteriarum ab impulsu sanguinis fieri & illustrari perspiciatur.

Intestinorum canis, vel lupi, vel cujusvis animalis inflatorum, & exiccatorum (qualia apud pharmacopeos vidimus) si in quavis longitudine, pars abscissa, aquâ imple-

92 *Exercitatio Anatomica II.*

impleta, utrinque ligetur, ut sit
 tanquam farcimen. Poteris ab unâ
 parte digiti ictu pulsâ & vibratâ, in
 alterâ extremitate adversâ, appli-
 catis digitis (ut suprâ carpi arte-
 riam solemus pulsum indagare)
 omnem ictum, & motus differen-
 tiam clarè sentire, atque hoc mo-
 do (ut etiam in omni vena corpo-
 ris turgente, sive viventis, sive
 mortui) poterit quispiam tyroni-
 bus omnes pulsum differentias, in
 magnitudine, frequentia, vehe-
 mentia, ritmo ad sensum æmula-
 ri, & docere, & indigitare. Tan-
 quam enim in longâ vesicâ reple-
 tâ, & in tympano oblongo, omnis
 ictus unius extremi in altero simul
 cernitur, proinde in hydrope ven-
 tris, sicut quoque in omni abscessu
 liquidâ materiâ oppleto. Solemus
 anasar-

anasarcam a tympanite distingueré, si omnis impulsus & vibratio, in uno latere facta, clarè in altero sentitur tactu, Tympanitem censemus; non, ut falsò existimatur, quia sonum tympani refert, & flatu tantum fiat; (quod nunquam accidit) sed quia, uti in tympano, omnis ictus levissimus pertranseat, & vibratio quævis percurrat: ferrosam enim, & ichorosam, qualis urina est, substantiam subesse denotat, & non aut lentam, aut viscidam, ut in anasarca, quæ impressa ictus & impulsione vestigia servat, non transmittit. Hoc experimento in medium adducto, oritur potentissima objectio, contra sanguinis circuitum, à nemine, qui contrà me scripserit, observata, aut opposita.

Quan-

94 *Exercitatio Anatomica II.*

Quandoquidem in hoc experimento, pulsus systoles & diastoles, videmus fieri posse, sine exitu liquoris, in arteriis idem posse ex ictu cordis contingere, sine circuitus necessitate, quis suspicabitur, & similiter Euripi in mortem, illic huc & vicissim, hinc illuc sanguinem agitari. Verum aliàs hanc difficultatem solvimus sufficienter, & nunc quoque dicimus, in arteriis viventium hoc non esse, quoniam continuò & continenter, auricula cordis dextra, ventriculum implet sanguine, cui tricuspides valvulæ regressum negant, & simul auricula sinistra sinistrum, & uterque ventriculus in systole, projicit sanguinem & protrudit, quem sigmoides valvulæ non sinunt remeare. Aut igitur alicubi ex pul-
moni-

monibus, & paritèr ex arteriis emigrare, continuè & continentèr debere; aut tandem alicubi stagnans & infarctus, vel continentia vasa difrumperet, vel cor ipsum distendendo suffocaret; ut in vivâ dissectione anguis (in libello meo de sanguinis motu) ad sensum contingere annotavimus. Ad hoc dubium declarandum, duo experimenta, inter multa alia commemorabo, quorum priùs antè retuli, quo clarè apparet sanguinem in venis, continuo & magno conatu & fluore, versus cor semper currere.

In jugulari venâ internâ denudatâ damæ vivæ, (coram multis nobilibus & Rege Serenissimo Domino meo assistentibus) per medium divisâ & abruptâ, ex par-

E

te in-

te inferiori, è clavicula surgente, vix guttæ quædam prodierunt sanguinis, quando magno impetu, & rotundo fluore prorumpente, longius deorsum è capite per alterum illius venæ orificium, sanguis uberimè scaturiret. Idem quotidie poteris observare in phlebotomiâ profluente sanguine: si uno digito, paulò infrà orificium, venam compressas, affatim fluor sistitur: quâ compressione solutâ, abunde denuò effluit, ut priùs.

In quâvis visibili longâ venâ cubiti, sursum extensâ manu, & omni sanguine deorsum è manu, quoad poteris, depresso: videbis venam, quasi (relictâ in cute foveâ) collapsam: quamprimum verò summitate unius digiti compressas, statim partem, manum versus,

sus, oppleri, turgere & (adveniente è manu sanguine) tumesceri percipies. Quid causæ est, quod si detento spiritu, & inde compressis pulmonibus, multo ingesto aëre, simul vasa pectoris comprimantur, inde sanguis in faciem & oculos multo rubore compellatur?

Quid, quod (ut Arist. in problematibus) omnes actiones, cum vi & robore magis obeuntur, detento anhelitu quam laxato? Sic è venâ frontis vel linguæ, compressione juguli, & retento anhelitu elicitur sanguis uberior.

Ego aliquando in cadavere humano novitè strangulato, intra duas horas à suspensione, aperto pectore & pericardio, (antequam faciei rubor evanuerat) auriculam dextram cordis & pulmones, plu-

rimùm distentos & infarctos sanguine, multis attestantibus ostendi, præcipuè verò auriculam, ad maximi hominis pugni magnitudinem, turgentem adeò ut disruptam iri putares. Quæ moles die sequente, refrigerato penitus corpore & per alias vias cruore dilapso, detumescens evanuerat.

Ita, ex his & aliis experimentis, satis constat sanguinem per venas omnes, ad cordis basin, procurrere, &, nisi transitus daretur, in alias vias coarctari, aut cor ipsum coobruì: uti ex alterâ parte, si non ex arteriis efflueret, sed regurgitatus reperiretur, appareret quantum opprimeret.

Aliam observationem addam:
Vir nobilis Eques Auratus Dominus Robertus Darty, progener doctissi-

doctissimi viri, & mihi amicissimi Medici celeberrimi Doctoris Argent: cum erat consistente ætate, sæpè de dolore quodam pectoris oppressivo, conquestus est; præcipuè nocturno tempore, ità ut quandoque lipothymiam, quandoque suffocationem à paroxismo metuens, vitam inquietam & anxiam degebat, multa incassum tentavit, omnium medicorum consiliis usus, tandem ingravescente morbo, cachecticus & hydropicus fit, & ultimò, in uno paroxismo vehementer oppressus, obiit. In hujus cadavere, (præsente D. Doctore Argent, qui tunc temporis præsiciens Collegii medicorum erat, & D. D. Gorge, Theologo & prædicatore egregio, qui illius parochii pastor fuit,) ex impedito

transitu sanguinis, de sinistro ventriculo in arterias, paries ipsius ventriculi sinistri cordis (qui satis crassus & robustus cernitur) disruptus & perforatus amplo hiatu sanguinem effundebat; erat enim foramen tantæ magnitudinis, ut facilè aliquem ex meis digitis reciperet.

Alium virum cordatum novi, qui præ irâ & indignatione, ob acceptam injuriam à potentiori & illatam contumeliam, adeo estuans exardescebat, ut auctis irâ & odio in dies (ob inhibitam vindictam) & animi passione vehementi, quo maximè exulceratus erat, nemini patefacto, tandem in mirum genus morbi incidit, summâque opprefione & dolore cordis & pectoris miserè conflictabatur, ut nullis.

adhi-

adhibitis experitissimorum Medicorum auxiliis proficientibus, in scorbuticam tandem post aliquot annos cachexiam incidens, contabuerit & mortuus fuerit.

Huic tantummodo aliquid solaminis accidit, quoties & quamdiu, tota pectoris regio, à fortissimo viro comprimeretur & (sicut pistor panem subigit) depfaretur & tunderetur. Amici ipsum veneficio, à maleficâ affectum putabant, aut cacodemone obsessum.

Huic quoque arteriæ jugulares, pollicis magnitudine distentę, tanquam utraque esset aorta ipsa, aut arteria magna descendens, altè & vehementer pulsabant & tanquam aneurismata duo oblonga apparebant, undè & arteriotomiam circa tempora tentavimus, sed nullo le-

vamine. In cadavere dissecto inveni cor & aortam, adeo distenta & sanguine referta, ut cordis moles & ventriculorum cavitates, bovini cordis magnitudinem, compensarent, & æquipollerent. Tantæ, sanguinis cohibiti vel conclusi, vires sunt, tantusque impetus.

Quamquam igitur (per experimentum pridem allatum) impulsus fieri, sine exitu (conquassatâ hinc indè aquâ) poterit in farcimine prædicto, idem tamen non potest sanguini, in vasis viventium, contingere, sinè summis & gravissimis impedimentis, & periculis.

Veruntamen exinde manifestum est, sanguinem in suo circuitu, non eâdem velocitate, & celeritate, ubique transire, neque eâdem vehementiâ, in omnibus locis,

cis, & partibus, & temporibus: sed pro ætate, sexu, temperie, habitu corporis, cæterisque rebus contingentibus internis, vel externis, naturalibus, vel non naturalibus, multum evariari.

Non enim per vias, & meandros occlusos, obstructos, aut impeditos, eâdem celeritate transit, quâ per apertos, reſeratos & patentes, neque per corpora aut partes densas, constrictas, infarctas, uti per raras, relaxatas, & deobstructas. Neque cum debilitè, lentè & mollitè fit impulsus, ità expeditè procurrit, aut penetrat, uti cum vi & robore impingitur, vehementiâ & copiâ, cogitur.

Neque crassus ipse sanguis, aut solidior, aut terrestrior factus, adeò penetrativus, uti cum serosior, at-

tenuatus & liquidior existit.

Et proindè rationabiliter existimandum est, sanguinem in circuitu suo, tardiùs pertransire per renes, quam per cordis substantiam; celerius per jecur, quam per renes; per lienem, quam per jecur; per pulmones, quam per carnes, aut alia aliqua viscera rarioris consistentiæ.

Similiter contemplari licet, de ætate, sexu, temperie, habituque corporis molli, vel duro, de ambientis frigore densante corpora, quando vix venæ appareant in artibus, aut color sanguineus cernitur aut calor sentitur, à pastu liquidiore factò sanguine ab accessione alimenti. Ita quoque venæ, conspicuè magis & liberè, effundunt in phlebotomia calefacto
cor-

corpore, quàm refrigerato. Videmus uti ab animæ passione, (dùm administratur phlebotomia) si inciderit pavidus in lipothyniam, statim sistitur sanguinis effluxus & pallor exsanguis totam corporis superficiem occupat, rigent membra, sibilant aures, oculi occæcantur & convelluntur. Campum invenio ubi longius percurrere, & latius speculando exspatiari possum. Sed enim tanta hinc veritatis elucescit lux, quâ tot problemata explanari, tot dubia solvi, tot affectionum & morborum causæ, & curandi occasiones investigari poterunt, ut peculiarem tractatum postulare viderentur. De quibus omnibus, in observationibus meis medicinalibus, admiratione digna tradam.

Quid enim magis admirari contingit, quam quomodo in omni affectu, appetitu, spe vel timore, corpus nostrum diversimodè patitur & vultus evariatur ipse, & sanguis huc aut illuc subterfugiens videtur? Ira rubent oculi, constringitur pupilla, in verècundia, ruboreque profunduntur genæ: timore, infamia & pudore pallida facies, rubent auriculæ, tanquam malè audituræ: cupidine tactis adolescentibus, quàm celeritè impletur nervus sanguine & erigitur, ac tenditur. Scire autem medicis est observatione dignissimum & utilissimum, quare omnem dolorem, sanguinis emissio, cucurbitulæ & arteriæ, deferentis fluxum, compressio & coarctatio artificiosa, (præsertim intereà dum fiunt)

fiunt) . tanquam incantamento sedant & auferunt : hæc , inquam , ad observationes , ubi clarè enodantur , referenda .

Perperàm , anatomicâ dissectione confirmanda & ex *curvis* quæ sunt credenda , inepti & inexperti , dialecticis & longè petitis argumentis , conantur vel evertere , vel stabilire . Quod in quæstione est sensibile & visibile , an sit necne videre , vel expertis credere teneri , quicumque scire desiderat , oportet ; neque ullâ aliâ certitudine clariori erudiri , aut doceri poterit .

Quis vinum dulce mustumve aquæ potum antecellere , iis qui nunquam degustârunt , persuadebit ? Quibus argumentis , solem esse lucidum , & suprâ omnes stellas splendentem , à natiuitate cæcis,

cis, confirmabit? Sic de sanguinis circuitu, quem tot sensibilibus ad autopsiam experientis confirmatum, jam per tot annos, habuerunt omnes. Nemo inventus est, qui rem sensibilem (videlicet motum fluxus & refluxus) sensibilibus pariter observationibus redarguere, aut experientiam allatam infringere, experimentis valuit; inò contrarium astruere ex *αὐτοψία*, ne tentavit quidem.

Cum interim non desunt, qui, ob inexperientiam & rudem ignorantiam anatomicam, nihil quidquā sensibile, in contrarium quod afferrent, habentes, vanis quibusdam & fictis, ex præceptorum auctoritate, receptis assertionibus, non probabilibus suppositis, sed quibusdam captiunculis vacuis ob-

stre-

strepunt ; multis verbis insuper ,
iisque haud dignis , sed maledi-
ctis, nec sine convitiis & contume-
lia oblatrant : quibus nihilo plus
agunt , quam ut dent operam, va-
nitatem & ineptias suas & malos
mores , argumentorumque (quæ
à sensu petenda essent) inopiam
prodere ut cum falsâ sophisticâ ra-
tione, adversus sensum insanire vi-
deantur. Haud aliter, maris sicu-
li ventorum turbine concitati flu-
ctus , contrà scopulos intrà Cha-
rybdin allisi, fremunt & refracti &
reverberati spumant, quàm hi con-
trà sensuum ratiocinium.

Si nihil admitteretur per sen-
sum , sine rationis testimonio, aut
contra quandoque rationis rece-
ptæ dictamen , jam nulla essent
problemata disputanda. Si non
cer

certissima per sensum fides foret, eaque ratiocinando stabilita, (ut in suis constructionibus Geometri solent) nullam perfectò admitteremus scientiam: quippè, ex sensibilibus de sensibilibus demonstratio rationalis, Geometrica est. Ad cujus exemplar, abstrusa & à sensu remota, ex apparentibus manifestioribus & notioribus, innotescunt. Meliùs multò Arist. nos admonet (lib. 31. de gen. An.) de generatione apum disputans: *rationi fides adhibenda* inquit; *si quæ demonstrantur, conveniunt cum iis, quæ sensu percipiuntur, rebus: quæ cum satis cognita habebuntur, tum sensui magis credendum quam rationi.* Unde probare vel improbare vel reprobare omnia ab examinatione minutim factâ debemus: *examinare verò*

verò & experiri, an recte an perperam dicta sint, ad sensum deducere oportet & sensus judicio confirmare & stabilire, ubi si quid fictum, non latet. Unde Plato in Critias difficilem non esse earum rerum explicationem asserit, quarum experientiam habere poterimus. Neque apti ad scientiam sunt auditores, qui nullam experientiam habent.

Quàm arduum & difficile sit, nullam experientiam habentibus, illa, de quibus experientiam aut sensibilem cognitionem non habent, docere, & quam inepti & indociles, inexpertique auditores sint ad veram scientiam, cæcorum de coloribus, surdorum de consonantiis judicia planè ostendunt. Quis unquam maris fluxum,
& re-

& refluxum, quis ex diagrammate geometrico, angulorum quantitates, aut laterum rationes, cœcos docebit? aut eos qui neque mare viderunt, neque diagrammata? Inexpertus in anatomicis, in quantum, propriis oculis & proprio exindè conceptu, rem non tenet, cœcus in iis quadantenus existimandus & ineptus ad doctrinam, non enim, de quibus disputet Anatomicus, neque ex quibus in rei natura insitis, desumat argumenta, quidquam ritè novit; sed cuncta illi pariter ignota sunt, tam quæ concluduntur, & colliguntur, quam ex quibus. Nulla autem possibilis cognitio est, ex non præexistente cognitione, eâque notiori: hæc una potissimum causa est, cur tam incerta & conjecturalis

lis nostra, de cœlestibus corporibus, scientia sit. Ab iis, qui causas & rationes omnium scioli adeò profitentur, scire velim, quare uti ambo oculi, simul hac atque illac, & quaquà versus sese intuendo moveant, nec sigillatim, iste illuc, hic istuc, se convertat oculus, ità nec ambo cordis auriculæ, &c?

Quia febrium causas, aut pestilentia, aut quorundam medicamentorum mirandas proprietates, ipsorumque causas non norunt, an propterea essent neganda?

Cur foetus in utero, non respirans aërem, usque ad mensem decimum, ob defectum respirationis non suffocatur? Cum natus in septimo, vel octavo, quamprimùm aërem inspiraverit, inhibita postmodum respiratione, ob defectum
aëris

114 *Exercitatio Anatomica II.*

aëris suffocetur? Quare in utero existens, vel adhuc intrà secundinas nondum exitum adeptus, vitam sine respiratione retinere poterit? quamprimum vero aëri semel expositus, nisi respiraverit, vitam retinere non possit?

Quoniam multos video hære-
re, & de circulatione dubitare, &
aliquos oppugnare ea, quæ de me
non penitus intellexerunt; in eo-
rum gratiam, breviter quid di-
ctum velim, quæ ex libello de
cordis & sanguinis motu, recapitu-
labo. Sanguis in venis conten-
tus (suo quasi fundo) ubi copiosis-
simus (in vena scilicet cava) juxta
cordis basin, & auriculam dex-
tram, sensim ab interno suo calore
incalescens, & attenuatus turget
& attollitur, (fermentantium in
mo-

modum) undè auricula dilatata suâ facultate pulsificâ se contrahens, propellit eum confestim in dextrum cordis ventriculum, qui impletus suâ systole, subsequenter sese ab illo impulso sanguine expediens (cum egressum valvulæ tricuspidæ impediunt) in venam arteriosam eundem (quâ patens porta datur) compellit, quò illius distentionem faciat. In vase arterioso, jam sanguis adversus valvulas sigmoides recurrere impotens, sed quia inspiratione, simul & expiratione, extenti, ampliati, & restricti sint pulmones, & unâ quoque vasa ipsorum, huic sanguini viam, transitumque, in arteriam venosam præbent: ex quibus auricula sinistra, simul & paritèr cum auriculâ dextrâ, motum, rithmum, ordi-

ordinem & functionem peragens, eundem, in sinistrum paritèr ventriculum, sanguinè intromittit; quem dextra in dextrum: unde sinister ventriculus simul & pariter cum dextro (quando regressus undè venerat propter eadem valvularum renitentium impedimenta prohibetur) in capacitatem aortæ & consequentèr in omnes arteriæ ramos impellit: arteriæ hoc subitaneo impulsu repletæ, cum non ità subitò sese exonerare possunt, distenduntur, impelluntur & diastolen patiuntur.

Undè cum continuè, & continetèr idem reïteretur, colligo, arterias, tum in pulmonibus, tum per universum, tot ictibus cordis & impulsionebus, sanguine adeò tandem distentas & infarctas iri,
ut

ut vel cessaret omninò impulsus, vel disrumperentur vel dilatarentur adeo, ut omnem massam sanguinis à venis exhaustam continerent, nisi alicubi effluente sanguine exonerarentur.

Idem quia etiam de cordis ventriculis ratiocinium repletis & ab auriculis infarctis sanguine, nisi pariter sese deplerent arteriæ tandem ad extremum distenti ventriculi, ab omni motu destituti fixique permanerent. Hæc collectio mea demonstrativa & vera est & necessaria, si vera sint præmissa: illa autem vera esse vel falsa, sensus nos facere debet certiores, non recepta ratio; *αὐτοψία*, non mentis agitatio.

Sanguinem præterea in venis, assevero semper & ubique, de minori-

noribus in majora currere, & versus cor ab omnibus particulis properare: unde colligo, quam copiam (continuè intromissam) arteriæ receperunt per venas traditam, eandem reverti, tandemque eò refluere, unde primum pelle-retur, & eo modo in circuitum sanguinem moveri, fluxu & refluxu à corde per impulsum, cujus impetu per omnes arteriarum fibras cogitur: postea, ab omnibus partibus, continuato fluxu, regredi per venas successivè, quibus absorptus & exhaustus traducitur: hæc vera esse docet sensus ipse & à sensibilibus collectio necessaria omnem dubitandi ansam tollit.

Denique hoc est, quod enarrare, & patefacere, per observationes, & experimenta conabar, non

ex

ex causis & principiis probabilibus demonstrare, sed per sensum & experientiam confirmatam reddere, anatomico more, tanquam majori authoritate, volui.

Ex his notandum, quam vim & violentiam, concitatumque vehementiam in corde & arteriis majoribus, tactu & visu percipimus. Pulsus systolen & diastolen (in animalibus maioribus calidioribus) non dico, in omnibus vasis sanguinem continentibus, eandem esse, neque omnibus sanguineis animalibus; sed talem & tantam in omnibus, ut exindè fluxus sanguinis & citatior cursus, per arterias exiles, partium porositates, venarumque omnium ramos, necessariò fiat, & exinde circulatio.

Nam neque exiles arteriæ, ne-

F

que

que venæ pulsant, sed duntaxat majores & cordi viciniore pul-
sant arteriæ: eo quod non ita fu-
bito emittant, ac impellitur san-
guis: nam experiri poteris (disse-
ctâ arteriâ & pleno gurgite exi-
liente sanguine, itâ ut liberè exeat
prout immittitur) in arteriâ illâ
per quam transit, vix pulsum per-
sentiri, quia datâ portâ transcur-
rens sanguis non distendit. In pis-
cibus, serpentibus, frigidioribus-
que animalibus, cor tardè & debi-
lità pulsat, ut vix in arteriis pul-
sum percipias, sanguinem quia
transmittunt lento admodum gra-
du. Unde in his, ut etiam mino-
ribus arteriarum fibris in homine,
nulla tunicarum â sanguine distin-
ctio, quia sanguinis impulsu non
percelluntur.

Rescis-

Rescissam & apertam arteriam, (ut dixi) pertransiens sanguis non impellit, neque pulsatur, undè clarè cernitur, arterias neque innatâ facultate pulsificâ, neque à corde demandatâ, sed solo sanguinis impulsu, diastolen pati: nam tum pleno ipso in fluxu longiùs profluente, tam systolem quandam, quàm diastolen discernere & tactu percipere poteris, ut antea dixi, omnesque pulsationis cordis differentias, rithmum, quinetiam & ordinem, vehementiam, intermissionemque in emanante fluore, (sicut in speculo imaginem) evidenter agnoscere. Quemadmodum, cùm aqua, vi & impulsu syphonis, per fistulas plumbeas in altum cogitur, singulas compressiones instrumenti, (per multa li-

cet stadia distent) in ipso aquæ exeuntis fluxu, singulorum ictuum ordinem, principium, incrementum, finem, vehementiam observare & distinguere possumus, ita ex abscissæ arteriæ orificio. Ubi notandum, ut in exemplo aquæ, continuum effluxum esse, licet modò longiùs exiliat modo propriùs, ità in arteriis, præter sanguinis concussionem, pulsus, vel vibrationem, (quæ non in omnibus, æquè cernitur) continuum exindè fluorem motumque fieri; quò usque primùm sanguis (in auriculam nempe dextram) ubi incepit, regreditur.

Hæc in rescissâ aliquâ arteriâ longiori, (ut jugulari) quam intrâ digitos si comprehenderis, exitumque modereris sanguinis, magis

gis aut minùs pulsare, amittere pulsum & recuperare, pro tuo libitu poteris explorare, ut clare discernantur. Et sicut, integro pectore hæc manifesta hoc modo fiant, ità aperto pectore & collapsis exindè pulmonibus, amissoque motu respirandi, brevi experiri poteris; scilicet, contrahi auriculam sinistram, inaniri, albidior fieri & tandem cum sinistro ventriculo pulsum intermittere, omittere, destituere & pariter ex rescissæ arteriæ foramine, minùs & minùs sanguinem, subtiliori filo & infirmiori pulsu, proruere, & denique (deficiente nimirum sanguine, & ventriculi sinistri impulsu) nihil ultrà emanare.

Idem ligatâ venâ arteriosâ experiri poteris, & auriculæ sinistræ

F 3. pul-

124 *Exercitatio Anatomica II.*

pulsum auferre, & solutâ restituere, pro arbitrio. Unde idem, hoc experimento, quod in moribundis, evidenter cernitur; quod sicut prius à motu & pulsu, ventriculus sinister desistat, postea sinistra auricula, deinde dexter, ultimò auricula dextra, ita à quo incipiat vitalis facultas & pulsus primò, deficiat ultimò.

Quibus per sensum exploratis, manifestum est, sanguinem per pulmones tantum pertransire, & non per septum cordis, & duntaxat à respiratione commotos, non collapsos, & requietos: unde probabile est, quare in embrione (cum nondum spirat) natura pro transitu sanguinis, in arteriâ venosâ (quo materia sinistro ventriculo, & auriculæ sinistræ suggeratur,)

tur,) foramen ovale aperuit, quod adolescentibus & liberè spirantibus occludit.

Patet quoque, cur oppressis, & infarctis vasibus pulmonum, vel quibus morbo graviore læsa respiratio, adeò sit periculosum & signum lethale.

Patet non minùs, quare sanguis adeò rutilans sit pulmonum; tenuior enim est, ut qui inibi transcolatur. Notandum ampliùs ex epilogo antedicto, iis qui causas circulationis efflagitant, & cordis virtutem, omnium effectricem suspicantur, & qui, ut pulsus transmissionis, ita attractionis, generationisq; sanguinis authorem credunt (cum Aristotele) atque à corde spiritus fieri, vitalemque calorem influentem, (idque cordis innato

calore, tanquam immediato animæ instrumento, vel vinculo communi & ad omnia vitæ opera peragenda organo primo) arbitrantur. Et ita sanguinis & spiritus motum, perfectionem, calorem quoque à corde tanquam ab origine mutuari, & omnem rationem sanguinis (quam Arist. dicit inesse sanguini qualem in aqua calida & in pulte ebulliente) corque causam primam esse pulsationis & vitæ existimant. Apertè si loquar, hæc ita esse, (ut vulgò recepta sunt) non opinor: multa enim sunt, quæ me in eandem sententiam ire suadent in generatione partium observanda; quæ hic recitare non expedit, sed prope diem forsan miraculosiora, majoremque lucem naturali philosophiæ

phiæ allatura, à me in publicum dabuntur.

Interim dicam tantum & sine demonstratione proponam (bona cum veniâ Doctissimorum virorum, & antiquitatis reverentiâ) cor, prout omnium in corpore principium, author, fons & origo, primaque vitæ causa est, unâ cum venis, arteriis omnibus, contentoque sanguine subintelligendum. Sicut cerebrum (cum suis omnibus nervis sensoriis, organis, & spinali medulla comprehensum) unum sensus organum adæquatum (ut loquuntur) est. Si vero per hoc vocabulum cor, corpus cordis, cum ventriculis & auriculis tantū subintelligatur, non puto esse sanguinis opificem, neque sanguinem, vim, virtutem, rationem, motum,

F 5. • • • aut

aut calorem, ut cordis donum habere: deinde neque eandem esse causam diaстоles & distentionis, quæ systoles & contractionis, sive in arteriis, sive in auriculis, sive ventriculis cordis, arbitror: sed pulsus pars quæ dyastole dicitur, aliam habet causam à systole diversam & semper omnem systolen ubique præcedere debet. Distentionis primam causam, calorem innatum esse, primamque distentionem esse in sanguine ipso, (fermentantium in modum,) sensim attenuato & turgente, in eoque ultimò extinctam puto. Aristotelis, pultis vel lactis in modum, exemplo assentior eò usque, ut illa elevatio, aut depressio sanguinis, non fiat à vaporibus, aut exhalationibus aut spiritibus, in ali-

aliquam formam, vapoream, vel aëriam concitatis, neque sit causata, ab externo agente, sed ab interno principio, regulante naturâ.

Neque cor (ut aliqui putant) tanquam Anthrax, focus, (instar lebetis calidi) caloris origo est & sanguinis, sed magis, sanguis calorem cordi (ut reliquis omnibus partibus) tribuit, quàm recepit, utpotè omnium in corpore calidissimus: ideò cordi arteriæ & venæ coronales assignantur, in eosdem usus, quos cæteris partibus: videlicet ad caloris influxum, pro fotu & conservatione ipsius: ideo calidiores omnes partes, quo magis sanguineæ &, quò sanguine magis abundant, calidiores convertibiliter dicuntur. Quâ ratione, cor suis cavitatibus insigne,

officina, fons, focus perennis, censendus est, non ratione corpulentia, sed contenti sanguinis, instar lebetis calidi. Qua ratione jecur, lien, pulmones, cæteræque partes calidæ reputantur, quia multas venas vel vasa continentia sanguinem habent.

Atque hoc modo autumo, calorem nativum, calidum innatum, (ut omnium operationum, commune instrumentum) pulsus quoque efficiens primum esse. Hoc non adhuc constantèr assevero, sed tantum pro thesi propono. Quid in contrarium objiciatur à viris doctis & probis, sine verborum scurrilitate, convitiis, vel contumeliis, scire libenter velim, & quisquis pergratum fecerit.

Hæc itaque transitus sanguinis,
& cir-

& circuitus, tanquam partes & vestigia sunt. Nempe de auricula dextra, in ventriculum; de ventriculo per pulmones, in auriculam sinistram; inde in ventriculum sinistrum, & in aortam, omnesque per arterias à corde, per partium porositates, in venas, & per venas, ad cordis basin, quàm celeritèr revertitur sanguis.

Uno experimento, quisquis placuerit, discernere per venas poterit, ligetur brachium (ut solent) mediocri ligaturâ & tamdiu brachium movendo, permaneat ligatum, quousque omnes venæ adprimè turgeant; & infra ligaturam tota cutis insignitèr rubescat, & tùm profundatur manus aquâ gelidissimâ vel nive, donec collectus infrà ligaturam sanguis refrigescat satis,

fatis, dein solutâ subito ligaturâ senties ex sanguine frigido revertente, quàm celeri cursu sursum ad cor properet, & quam mutationem reversus in corde faciat; ut mirum non sit, quosdâ à solutâ ligaturâ, post phlebotomiam, in lypothymiam incidisse: Hoc experimentum monstrat, quod infra ligaturam venæ turgeant non sanguine attenuato & spiritu vel vaporibus sufflato, (talem enim ebullitionem, immersio in frigidum deprimeret) sed solo sanguine, eoque, qui in arterias, vel per anastomoses, vel cæcos meandros, reverberari non potest.

Docet insuper quomodò per altos montes nivosos oberrantes, morte sæpe de improvviso opprimantur, atque alia multa hujusmodi.

Qua-

Qualiter sanguis pertransire,
per omnes partium poros possit,
ne durum hoc videatur, & quaquà
versus inear, unum addam expe-
rimentum. Laqueo strangulatis,
& suspensis, accidit idem, quod
brachio ligato, ut trans chordam,
scilicet facies, oculi, labia, lingua,
partesque omnes superiores capi-
tis, plurimo infartiantur sanguine,
maximo rubore perfundantur, tur-
gescantque usque ad livorem: in
hujusmodi cadavere, soluto la-
queo, quacunque positione collo-
caveris, intrà non inultas horas,
videbis omnem sanguinem, vul-
tum & caput deferere & à supinis
& sursum positis partibus, in prò-
nas & subjectas, per poros cutis,
carnis, cæterarumque partium (suo
quasi ductum pondere) decumben-
tem

tem & omnes illas partes infrà positas & cutem potissimum replentem, atro tabo colorare. Quantò magis sanguis vivus, & spirituosus, vivo corpore, apertis porositatibus penetrativus, quàm cruor mortuus coagulatus, præsertim per habitū corporis frigore mortis densatum, viisque stipatis & compressis: tantò facilior per quasunque partes, transitus in vivis est & pronior.

Ingenio pollens, acutissimus vir, Renatus Cartesius (cui ob mentionem mei nominis honorificam debeo,) & alii cum ipso, cum extractum cor piscium super planam tabulam expositum, pulsum æmulari vident, (colligendo seipsum) quando erigitur, attollitur & vigoratur, ampliari, aperiri, ventriculos-

culosque suos, exindè capaciores esse autumant, haud rectè mecum observant. Collectum enim cum est, tunc temporis, coarctari potius capacitates ejus omnes, & in suâ systole esse, non diastole certum est: ut neque, quandò tanquam enervatum collabitur & relaxatur, in suâ diastole & distentione tum est, & ventriculi exindè ampliores; sic in mortuo, non dicimus in diastole esse cor, quia à systole concidit relaxatum, collapsum, omni motu destitutum, & requietum, non distentum: distenditur enim & in sua diastole propriè est, cum ex impulsione sanguinis per contractionem auricularum impletur, ut in vivorum anatome evidenter satìs apparet.

Latet ipsos ergò, quantum distet.

136 *Exercitatio Anatomica II.*

stet, relaxatio & relapsus cordis & arteriarum, à distentione vel diastole; & quod eadem causa distentionis, relaxationis & constrictionis, non sit; sed potius contrariorum effectuum, contraria; diversorum motuum, diversa; sicut adductionis & extensionis, cujusvis membri, oppositos esse musculos antagonistas, sat omnes Anatomici norunt. sic contrariis motibus, aut diversis, contraria & diversa activa organa, à naturâ, necessariò fabricata.

Neque mihi arridet, causa efficiens pulsus, quam posuit (secundum Arist.) eandem fore tam systoles, quam diastoles (nempè effervescentia sanguinis, tanquam ebullitione facta.) Sunt enim isti motus, subitanei ictus, celeresque per-

percussiones. Nihil verò ità quasi nictu oculi, fermentatione, vel ebullitione, assurgit & collabitur: sed lentè sufflatur, quod affatim deprimitur. Præterquam quod in dissec-tis, autopsiâ cernere liceat, ventriculos cordis, ab auricularum constrictione, distendi & repleri, & prout magis vel minus replentur, augeri; distentionem etiam cordis, inotum quendam violentum esse, ab impulsione, non ab attractione aliquâ, factum.

Sunt aliqui, qui existimant, sicut ad plantarum nutritionem, impulsu alimentum non eget, sed sensim ab indigentibus particulis, attrahitur ad locum deperditi, ita neque animalibus, non sit aliquis impulsus necessarius, quandoquidem similiter vegetativa facul-

138 *Exercitatio Anatomica II.*

facultas in his, atque illis, opus suum perficiat: verum diversa ratio est. Calidum influens perpetim requiritur, ad animalium membra fovenda & in vivis vivifico calore conservanda, &, ab externis injuriis refracta, restituenda, non ad nutritionem duntaxat.

Hæc de circuitu: qui, si vel impeditur, vel pervertitur, vel nimium concitatur, multa periculosa morborum genera & symptomata admiranda consequuntur: sive in venis, ut vafices, apostemata, dolores, hæmorrhoides, hæmorrhagiæ: sive in arteriis, ut tumores, phlegmones, dolores intensissimi & lancinantes, aneurismata, farcoses, fluxiones, suffocationes subitanæ, asthma, stupor, apoplexiæ, & alia innumerabilia.

Quo-

Quomodo subito quandoque, instar incantamenti, auferantur & turentur quædam putata immedicabilia, non est hujus loci, ut enarrem.

Inter medicinales observationes & in pathologiâ, ea tradere potero, quæ nunquam hætenus à quovis observata comperio.

Concludam, ut tibi satisfactionem pleniorē faciam (Doctissime Riolane) qui in mesentericis venis, circulationem non fieri existimas, ligetur porta juxta jecoris cymum, in vivâ dissectione (quod facile poteris experiri) videbis, ex venarum, infrà ligaturam, turgentia, idem, quod in administratione plebotomiæ, ex ligatura in brachio, accidere, quod transcursum inibi sanguinis patefaciat.

Et

Errata sic corrige.

Pagina 7. lin. 11. *lege* five. pag. 10. lin. ultim. *leg.* dubium. pag. 11. lin. 8. *leg.* aortam. pag. 22. lin. 1. *leg.* dicuntur. pag. 39. lin. 4. *leg.* adinveni. pag. 40. lin. 15. *leg.* cum. p. 94. lin. 7. *leg.* morem.

140 *Exercitatio Anatomica II.*

Et cum videris opinari sanguinem, de venis in arterias, per anastomoses, regredi posse, ligetur in vivâ dissectione, vena magna descendens, juxtâ divaricationem ramorum cruralium; & quàm primum rescissâ arteriâ, quia datur porta; omnem massam sanguinis, ex omnibus venis (etiam cava ascendente) brevi pulsu cordis exhaustam fore videbis; tamen ultra ligaturam, venas crurales & inferiores partes duntaxat repletas. Quod, si alicubi in arterias per anastomoses regredi potuisset sanguis, nullatenus accideret.

F I N I S.

Errata sic corrige.

Pagina 7. lin. 11. *lege* five. pag. 10. lin. ultim. *leg.* dubium. pag. 11. lin. 8. *leg.* aortam. pag. 22. lin. 1. *leg.* dicuntur. pag. 39. lin. 4. *leg.* adinveni. pag. 40. lin. 15. *leg.* cum. p. 94. lin. 7. *leg.* morem.

